

文

忠

集附拾遺

二







文 忠 集
附 拾 遺
(二)

顏 真 卿 撰

王雲五主編
叢書集成初編

文 忠 集
附 拾 遺
二 冊

中華民國二十五年十二月初版

撰 者 顏 真 卿

發 行 人 王 雲 五
上海河南路

印 刷 所 商 務 印 書 館
上海河南路

發 行 所 商 務 印 書 館
上海及各埠

殿

文忠集拾遺目錄

卷七

象魏賦

請除禪服奏

請除素練聽政奏

請定武成廟釋奠奏

更定昏禮奏

駁吏部尙書韋陞諡忠孝議

元陵儀注

卷二

對三命判

案楊志堅妻求別適判

訪求清河行人李華牒

與李太保帖二首

與盧倉曹帖二首

與劉中使帖

一行帖

南來帖

江外帖

草篆帖

世系譜序

送福建觀察使高寬仁序

汎愛寺重修記

湖州石柱記

項王碑陰述

左納言史務滋像贊

永字八法頌

蒲塘辨

周太師蜀國公尉遲公廟碑銘

華蓋山王郭二真君壇碑銘

晉侍中右光祿大夫本州大中正西平靖侯顏公大宗碑銘

祕書省著作郎夔州都督長史上護軍顏公神道碑銘

攝常山郡太守衛尉卿兼御史中丞贈太子太保諡忠節京兆顏公神道碑銘

卷三

正議大夫行國子司業上柱國金鄉縣開國男顏府君神道碑銘

和政公主神道碑銘

朝議大夫守華州刺史上柱國贈祕書監顏君神道碑銘

朝議大夫行江陵少尹兼侍御史荆南行軍司馬上柱國顏君神道碑銘

左衛率府兵曹參軍賜紫金魚袋顏君神道碑銘

杭州錢塘縣丞殷府君夫人顏君神道碣銘

橫山廟殘碑

水亭詠風聯句

溪館聽蟬聯句

斷句

文忠集拾遺 目錄

逸文待訪目

逸詩待訪目

卷四

年譜

文忠集拾遺卷一

象魏賦以象懸國章。道崇政理爲韻。

曰有唐之建都兮。蓋法天而立象。濬重門於北極。聳雙闕以南敞。夾黃道而崑峙。干青雲之直上。豈一人之是憑。抑萬國之攸仰。泊乎青陽戒節。玉紀迴天。萬戶聞漏。以傳響。百僚執贄。而獻年。逾人之木鐸。旣徇天子之金章。是懸觀乎渙發。大號孚崇聖德。澤如春流。義若泉塞。公卿翼翼。而仰化。黎庶欣欣。而無忒。自皇明而播九重。由京師而降萬國。美哉真盛代之聖明也。爾其闕之爲用也。叶古典。布新章。積非煙之疊。疊。靠佳氣之蒼蒼。扣峻墉以龍峙。屹中天而鳳翔。伯玉過而必肅。子牟懷而不忘。若乃盤礪國門。巍峩穹昊。覆瑤草於輦路。接青槐於馳道。巨玉斗而彌永。半金城以處好。旣悅功於子來。抑有符於靈造。及夫霜天肅霽。曙景涵風。對巖廓而隱麟。映玉樹以玲瓏。旣岌岌以業業。亦穹穹而崇崇。縱黃金與紫貝。孰並美而傳功。童子何知。謬膺邦政。徒欲竭其鄙思。諒難酬於嘉命。且賦頌之作。本乎情性。雖杼軸而屢空。聊高歌以爲詠。亂曰。巍巍雙闕兮。岳立雲峙。政令因斯以繇有兮。黎元賴此以獲理。敢頌美於一時。庶流芳於千祀。

請除禫服奏大歷十四年六月

哀號在疚。開闢所無。誠懇尙遠。庶僚增懼。伏見百辟並已釋除。事旣合權。禮無獨異。不可以吉凶兼制。臣

子殊儀。伏乞奉顧命之文節。因心之孝。順時卽吉。屈己臨朝。則萬姓心安。四方事集。臣典司儀注。不敢輕移。冒犯宸嚴。無任懇迫。

請除素練聽政奏

大歷十四年六月

孝德動天。事踰前古。德音俯降。感咽載深。臣伏守遺詔。禮從易月。祥禫變除。儀注皆備。若陛下未忍卽吉。更服練巾。則遺詔不得奉行。羣僚無以覲見。伏乞俯順人望。仰遵先旨。實大孝不虧。萬方幸甚。臣職在典禮。愚守如前。無任懇迫之至。

請定武成廟釋奠奏

建中二年

治武成廟。請如月令。春秋釋奠。其追封。以王宜用諸侯之數。樂奏軒縣。

更定昏禮奏

建中元年十一月

奏郡縣主見舅姑。請於禮會院過事。明日早。舅姑坐堂上。行執笄之禮。其觀華燭仗。以昏禮主敬。竊恐非宜。並請停障車下。壻卻扇等。行禮之夕。可以感恩。至於聲樂。竊謂非禮。並請禁斷。相見儀制。近代設以氈。綬。擇地而置。此亦非禮。合於堂室中。置帳。請準禮施行。俗忌今時。以子午卯酉年。謂之當梁年。其年娶婦。舅姑不相見。蓋禮無所據。亦請禁斷。

駁吏部尚書韋臯諡忠孝議

上元元年八月

出處事殊。忠孝不並。已爲孝子。不得爲忠臣。已爲忠臣。不得爲孝子。故求忠於孝。豈先親而後君。移孝於

忠則出身而事主。所以叱馭而進。不憚危險。故王尊爲忠臣。思全而歸。恐有毀傷。故王陽爲孝子。則知晝之與夜。本不相隨。春之與秋。豈宜同日。且以爲尙書志業高遠。羽儀前朝。百行之中。能事甚衆。議行稱諡。固多美名。何必忠孝兩施。然後表德。歷考前史。恐無此事。敢率愚見。請更商量。

元陵儀注

將復於太極殿內。高品五人。皆常服。以大行皇帝袞冕服。左荷之。升自前東嚳。當屋。履危。北面。西上。三呼而止。以衣投於前。承之以篋。自阼階入。以覆大行皇帝之上。復者徹殿西北扉。降自後西嚳。其復衣。不以襲斂。洛則去之。旣復。乃設御牀於殿內。楹間。去腳舒單簟。置枕。遷大行皇帝於牀南首。以衣覆體。去死衣。楔齒。用角柄綴足。以燕几。棹在南。其殿內東西哭位。嗣皇帝以下。舒草薦焉。奠用酒脯醢器。用吉器。如常儀。其告喪之禮。使至所在。集州縣官及僧道。將吏百姓等。於州府門外。並素服。各以其方向京師。重行序立。百姓在左。僧道在右。男子居前。婦人居後。立訖。使者立於官長之左。告云。上天降禍。大行皇帝。今月某日。奄棄萬國。刺史以下。撫膺哭踊。盡哀止哭。使者又告云。大行皇帝有遺詔。遂宜訖。刺史以下。又哭。十五舉聲。使者又告。皇帝伏準遺詔。以今月某日。卽位。刺史以下。再拜。稱萬歲者。三百。姓及州縣佐史。朝夕巷哭。各十五舉聲。三日釋服。節度觀察團練使。刺史。並斬衰經杖。諸文武官吏。服斬衰。無經杖。大小祥釋服。並準遺詔。其有勅書。使者宣告如常禮。將沐浴。內有司爲塋於殿西廊下。累塊爲竈。東面。以俟。煮沐浴新盆。盤瓶鬲。皆濯之。陳於西階下。掘塋於西階之西。陳明衣裳於其側。帛巾一方。尺八寸。沐巾二。浴巾四。皆

用帛練櫛及浴衣。各實於篋。將沐浴。內掌事者奉米潘及湯。各盛以甕。并沐盤。升自西階。授沐者以入。嗣皇帝妃公主等。悉出帷外。嗣皇帝以下在殿東楹間。北面西上。內命婦以下在殿西間。北面東上。俱立哭。既沐而櫛。將浴。內執事者六人。抗衾御者四人。浴拭以巾。拈用浴衣。設牀於大行東。衽下莞。席上簟。浴者舉大行。易牀。設枕。理其鬚髮。斷爪。盛於小囊。大斂卽內於棺中也。著明衣裳。以方巾覆面。以大斂之衾覆之。內外入。就位哭。內有司奉盤水。升堂。嗣皇帝出盥手於帷外。洗玉若貝。實筭。執以入。西面坐。發巾。徹枕。奠玉貝於中之右。大臣一人。親納梁飯。次含玉。既含訖。嗣皇帝復位。執服者陳襲衣十二稱。實以箱篚。承以席。去巾加面衣。訖。設充耳。著握手及手衣。納寫。乃襲。既襲。覆以大斂之衾。乃開帷。內外俱入。復位。哭。將小斂。內外各隨職備辦。尙食先具大牢之饌。厥明而小斂。於斂前三刻。侍中版奏。請中嚴御府令。設小斂牀於大行西南首。枕席備焉。加以幄帷。周以素帷。主衣先率所司。陳小斂之衣。十九稱。及絞衾於殿中間之東席上。南領。西上。小斂前二刻。開宮殿諸門。諸衛各勒所部。仗衛如常式。設百官位。次及二王。後三恪等位。又設內外命婦等拜哭位。小斂前一刻。侍中奏外辦禮儀使。引嗣皇帝及皇子等。扶引各卽位。從臨者哭。內謁者引諸王等進就位。百官亦入就位。執禮者稱哭。在位者皆哭。侍御小臣升殿。先布衣於絞上。乃遷於衣上。舉衾而斂。以次加衣十九稱。畢。乃結絞而衾焉。近侍扶嗣皇帝哭。進跪。馮大行。興哭踊無數。扶引還次。尙食奉饌入。列於殿東。太常博士引司徒省饌省。訖。奉饌升。設於大行東。齋郎取爵於篋。受酒爵。跪奠。興嗣皇帝以下哭踊如初。諸行事者應退者降退。奉禮郎稱止。謁者引諸王還。內省禮使奏。嗣皇

帝哭止。近侍扶引退便次。內外侍臨者代哭不絕聲。百官退位如常式。其日大斂。前三刻。侍中版奏請中
嚴內外皆哭。御府先設大斂牀於大行皇帝西。南首。枕席幃帳如初。所司先陳大斂之衣百二十稱。及綬
紵衾并六玉於殿兩楹之東席上。南領西上。衣必朝祭。及五時正服。前二刻。開宮殿諸門。諸衛各勒所部
陳設如常儀。設皇帝位於殿東間。西向前一刻。引諸王以下就位。皇弟於皇帝位東。稍北。西向。南上。皇子
於皇弟之東。亦南上。皇叔在皇帝位北。稍西南向。西上。皇叔祖次皇叔之東。皇從父兄弟在皇子北。稍東
南上。諸公主。大長公主。長公主以下。並於西間北牖下。西上。通事舍人引百僚並入。依班序立。侍中版奏
外辦內高品扶皇帝就位。立定。典儀曰。再拜。禮儀使奏請再拜。皇帝哭踊。再拜。在位者皆哭踊。再拜。十五
舉聲。禮儀使奏請止哭。內外皆止哭。內高品扶皇帝就次。諸王公主以下。百寮各就次。中官內官掌事者
皆盥訖。升斂如小斂次。加衣畢。乃以組連珪璋璧琮璜六玉而加焉。所司以梓宮龍輜。緋等入。陳於殿
西階下。至時。司空引梓宮升自西階。置於大行皇帝西南首。加七星版於梓宮內。其合施於版下者。並先
置之。乃加席褥於版上。以黃帛裹施仰奠。晝日月星辰龍龜之屬。施於蓋。陳衣及六玉。斂訖。中官掌事者
奉大行皇帝卽梓宮。內所由先以白素版書應入梓宮內一物以上稱名。進入梓宮。然後加蓋。事畢。覆以
夷衾。皇帝至位哭。內外皆就位哭。太祝酌酒進。授皇帝執爵進。奠於饌前。少退。禮儀使奏請止哭。內外皆
止哭。太祝跪讀祝文曰。維某年日月。哀子嗣皇帝臣某。敢昭告於考大行皇帝。日月過速。奄及大斂。攀號
擗踊。五內屠裂。謹以一元。大武。柔毛。剛鬣。明粢。薌合。薌苾。嘉蔬。嘉薦。醴齊。尙饗。其後祝文大約準此讀訖。皇帝再拜。

哭踊。在位者皆再拜哭踊。十五舉聲。禮儀使奏止哭。左右高品扶皇帝還次。諸王公主以下各還次。百寮序出。大斂訖。所司設太常畫日月十有二旂。杠九仞。旂委地。大斂之後。分置殿庭之兩階。又設銘旌。以絳廣充。幅長二丈九尺。題曰某尊號皇帝之柩。立於殿下。設重於殿庭。近西南。其制先刊鑿木。長丈二尺。橫者半之。取沐之米爲粥。盛以八鬲。羃以疏布。懸於重內橫木上。以葦席北向。屈兩端交於上。綴以竹篾。既大斂。內所由執龍輜左右綽。引梓宮就西間。將監引所由并柏壑等。升自西階。所由設熬黍稷。盛以八筐。加魚腊等。於龍輜側南北各一筐。東西各三筐。設訖於西面壘之。先以繡黼覆梓宮。又張帟三重。更以柏木方尺長六尺。題湊爲四阿屋。以白泥四面塗之。欂事訖。所司設靈幄於欂宮東。東向。施几案。服御如常儀。侍臣捧袞裳冠經杖。盛以箱。就次。進皇帝服訖。諸王公主以下及百寮亦各服其服。光祿卿率齋郎捧饌入。禮儀使引升。陳設訖。禮儀使就位。奉引皇帝至位哭。內外皆就位哭。既定陵地。擇地使就其所。卜筮之。將卜。使者吉服。掌事者先設使以下次於陵地東南。使者至陵地。待於次。太常卿涖卜。服祭服。祝及卜。師筮師凡行事者皆吉服。掌事者布筮席於元宮位南。北向西上。贊者引涖卜者及太祝立於筮席西南。東向。南上。卜師立於太祝南。東面北上。贊者引使者詣卜筮席南十五步許。當元宮位。北向立。贊者立於使者之左。少南俱北向立定。贊者少進。東面稱事具退復位。涖卜者進立於使者東北。西面卜師抱龜。筮師開鞶出策。兼執之。執鞶以擊策。進立於涖卜者前。東面南上。涖卜者命曰。維某年月朔日子哀子嗣。皇帝某。謹遣某官某乙。奉爲考大行皇帝度茲陵兆。無有後艱。卜師筮師俱曰。諾。遂述命於右。旋就席。北坐。

命龜曰。假爾秦龜有常。命筮曰。假爾秦筮有常。遂卜筮訖。興各以龜筮東面占曰。從還本位。贊者進使者之左。東面稱禮畢。贊者遂引使者退。立於東南隅。西面若不從。又擇地卜筮如初儀。啓前十日。皇帝不坐。以過山陵。前啓一日。門下省奏。某日某時。啓太極殿。橫宮啓日之晨。奉禮郎設御位於大極殿之東間。當帷門。西向。諸王位在後。以南爲上。典儀設鄴公、介公、皇親、諸親、文武九品以上。及前資常參官、都督、刺史、版位於太極殿中庭。又設蕃客、酋長位於承天門外之西。僧道位於承天門外之東。並以北爲上。左右金吾與諸軍計會。量抽隊仗。隨便設禁。其日質明。皇帝服初衰絰杖入就位。晨哭。諸王具衰絰去杖。就位哭。鄴公、介公、皇親、諸親等。及文武九品以上。各服初喪服。去杖入就位哭。大長公主、長公主、公主、郡縣主等。亦衰服入。就內位哭。中官皆布巾。喪馭侍衛晨哭。並再拜退位。通事舍人引蕃客酋長及僧道。分立於承天門外之位。啓前二刻。內所由設奠席及香燭於帷門之外。奉禮郎設盪洗於東階下。西南北面。盪水在洗東。篋在洗西。南肆設太尉版位於東南。西向。設司空位於太尉位之南。少退。禮生一人執拂。梓宮之巾陪其後。設禮儀使位於太尉之北。少退。禮官等陪後。設監察使位於禮儀使之下。光祿卿具太宰之饌。俟於東階下。又於饌上設罇。罇位於奠席東南。北向。加酌。禮儀使立於罇。罇東。御史立於罇。罇西。太祝奉禮郎立於罇。罇南。爲位。禮官在禮儀使後。啓前一刻。侍中版奏。外辦禮官贊。執事官入就階下位。禮儀使等橫行。以西爲上。再拜訖。升就位。禮官省饌訖。贊。光祿卿引饌。升自東階。列帷門外席上。近侍引皇帝。具衰絰入。就位。哭踊。禮儀使前進。跪奏。請再拜。皇帝再拜。諸王妃主等。並各就位。晨哭。禮生引太尉。通事舍

人分引羣官各入就位。禮官贊。太尉再拜。又一人贊。羣官再拜。哭。十五舉聲。禮官各贊。止哭。禮生引太尉詣疊。洗手。洗爵。升自東階。詣罇。坫所。太祝舉幕。酌醴。齊以授太尉。禮儀使跪奏。請皇帝止哭。奉皇帝之杖前進。中官承傳止哭。殿內皆止哭。太尉以醴齊於皇帝之左。跪進醴齊。皇帝受醴齊。跪奠於罇前。俛伏。興。少退。立。太祝持版進。北面跪讀祝文。訖。奠版。俛伏。興。退。復位。皇帝再拜。哭踊。殿內及庭中文武九品以上。皇親。諸親等。皆哭。十五舉聲。止。禮儀使跪奏。獻畢。請皇帝退。復位。禮官引太尉及禮儀使降。復階。下位。所由徹饌。執事官序降。訖。皇帝退。就次。禮生引司空執巾。升自東階。於櫜宮南。北向立。司空跪啓曰。謹以吉辰啓櫜塗。告訖。太尉哭。羣官皆哭。通事舍人分引羣官序出。掌事者升。徹櫜塗。徹訖。司空以巾拂拭梓宮。覆以夷衾。綃幕。內所由周迴設帷。及施常食之奠。如常儀。訖。禮儀使升。就舊位。禮官陪後。皇帝衰絰就位。哭。通事舍人分引羣官入就位。皇帝稽顙。禮儀使請再拜。皇帝哭盡哀。禮儀使跪奏。請止哭。降出。羣官再拜。哭。十五舉聲。訖。又序出。太極門外。北向。重行立班。奉慰如常儀。退。前二日。所司設文武羣官次。於太極門外東西廊下。又設帳殿於庭。帳內設吉幄。幄內設神座。南向。又設龍輻素幄。於殿庭吉幄之右。前一日。午正後一刻。除殿上葦障。及階下凶庭并版城。少府所由移旒。附於重北。未正後一刻。典儀設羣官夜哭版位。如晨夕哭儀。又設挽歌席位於嘉德門內。設挽郎挽士席位於嘉德門外。並左右序。設北向。相對設鼓吹嚴警位於承天門外。晝漏未盡三刻。有司設庭燎。終夜。通事舍人分引羣官就版位。立定。禮官贊。哭。哭畢。退。就次。挽歌作。盡二點止。嚴警次發。盡五點止。二更。羣官哭。及挽歌。鼓吹嚴警。如上儀。其三。更。四

更五更並準此。其一日前二刻奉禮郎設御座。所由設奠席。奉禮設盪洗。及禮儀使太尉版位於東階下。光祿卿具太牢饌。並如啓奠之儀。前一刻侍中進奏。外辦禮官省饌。光祿卿引饌。禮生引太尉禮儀使等。橫陳再拜訖。升殿。通事舍人分引羣官入就位。亦如啓奠之儀。禮儀使跪奏。請皇帝止哭。奉奠。皇帝去杖。前進。中官承傳止哭。殿內止哭。太尉以醴齊於皇帝之左。跪進。皇帝受醴齊。跪奠於饌前。俛伏。與少退。立。太祝持祝版進。北面跪讀祝文。訖。奠版。俛伏。與退。復位。皇帝再拜。哭踊。殿內及庭中文武官九品以上。皇帝諸親等。皆哭。十五舉聲。止。禮儀使跪奏。獻畢。請皇帝退。復位。禮官引太尉降。復階下位。所由徹饌。執事官序降。內所由徹殿上帷帳。唯南北施素帷於舊帳坐所。以爲障蔽。前設常食。少府監進輜車於西階下。禮儀使跪奏。皇帝奉甯龍輅。奏訖。降出。近侍扶皇帝就龍輅前。哭踊盡哀。乃復位。執事者以纛旒及重先導。禮官一人朝服贊。尚輦奉御帥腰輿。繖扇至神座前。侍奉如常儀。內侍捧几置輿上。繖扇侍奉至殿庭。帳殿下神座前。跪置座上。內謁者帥中官設香案於座前。繖扇侍奉如儀。禮官一人引符寶郎一人。主寶二人。以赤黃褥案進。取諡寶。又禮生二人。亦以赤黃褥案進。取諡冊。開元陵諡冊文。文曰。維某年月日。哀子人道近。曠鮮克。究知致盡。其所見。泣以敘財成之業。伏惟大行皇帝。紹休七聖。臨照八極。以至道御羣。有以。至化懷遠。方登假於上。敷聞在下。嗚呼。元服。頃昇。儲闈。生知之敏。動冠百王。大舜周文之孝也。齊栗之容。著奉。養。蕭宗也。愛敬之禮。深。履。燕。燕。躬。翼。翼。不。絕。離。道。日。朝。寢。門。此。則。首。冠。百。王。大。舜。周。文。之。孝。也。齊。栗。之。容。著。儒。尚。齒。尊。道。愛。德。躬。理。盡。性。之。學。履。天。緯。地。之。文。包。荒。舍。垢。之。量。迪。哲。允。恭。之。善。斯。又。睿。聖。不。測。同。符。乎。三五。無。得。而。稱。也。當。祿。山。叛。亂。陷。覆。二。京。以。天。文。之。重。授。元。戎。之。律。師。之。所。及。狂。寇。殲。夷。復。宗。社。之。初。朝。義。拯。生。靈。於。焚。燎。則。乾。維。重。構。宸。極。以。安。及。史。盜。問。雲。三。河。屢。梗。在。撫。軍。之。際。思。明。殞。命。乘。踐。祚。之。初。朝。義。授。首。則。梁。陳。底。定。朔。易。從。風。其。或。風。疆。於。大。梁。背。誕。於。南。越。莫。不。朝。爲。梟。獍。夕。爲。鯨。鯢。此。高。光。之。功。神。武。之。畧。也。自。是。肅。勿。羣。后。實。延。萬。靈。滄。海。猶。鬱。沒。之。刑。廢。焚。瘞。懸。沉。之。禮。備。衣。冠。有。淪。於。脅。從。者。釋。而。罪。問。疑。

祇有關於禮祀者。秩而致享。聖讖說求讖言。扇以祥風。浸以膏澤。九譯奉貢。四夷將寶。丕冒日出。罔不率俾。猶復嚴恭寅畏。願省闕遺。兢兢業業。日仄不暇。故得元功廣運。協氣旁流。靈契畢發。元符浚至。則瑞璧出於金版。遠承憑几之命。奄遺綴衣之酷。號天扣地。罔所依歸。今龍樓就啓。盤輅將駕。採鴻儒碩生之義考。公卿百辟之請。僉以盛德大業。匪號謚莫宜。是用虔奉古訓。發揚茂實。謹遣攝太尉某奉册上。尊謚曰睿文孝武皇帝。廟曰代宗。伏惟明靈降格。膺茲典禮。誕錫純嘏。貽燕後昆。嗚呼哀哉。禮官授之。並隨禮官先詣册車。安置其舊寶册。準次取置於車。侍中當龍輜南跪奏。請龍輜降殿。太常卿帥執鬻者。升以鬻障梓宮。中官高品等侍奉其側。司徒帥挽士升。奉引龍輜降殿。禮儀使引近臣及宗子三等以上。親進梓宮。少府將作所由并挽士奉梓宮登於龍車上。遂詣帳殿。下素幄。皇帝哭從。諸王等陪從。公主內官等周以行帷。皆哭踊而從。羣官立哭於庭中位。以俟祖奠。祖前一刻。奉禮郎設御位於龍輜幄之東南。西向。所由設奠席於龍輜幄前。奉禮郎設罇坵於帳幄東南。又設太尉位於罇坵東南。西向。禮儀使在其下。監察御史次之。又設壘洗篚於太尉位西南。北向。光祿卿帥齋郎捧饌。俟於橫街之次。北面。西上。禮官進省饌。訖。禮生贊光祿卿捧俎進。跪奠於席上。諸齋郎捧饌隨列於席上。禮生引禮儀使及太尉就位。禮官贊哭。又一人贊羣官哭。又各贊止哭。禮儀使導皇帝立於龍輜之東南。西向。禮生引太尉詣壘洗盥手。洗爵。執詣罇坵所。太祝舉冪酌醴齊。以授太尉。禮儀使跪奏。請皇帝止哭。奉奠。皇帝去杖前進。中官承傳止哭。諸王妃主等皆止哭。太尉以醴齊於皇帝之左。跪進。皇帝受醴齊。跪奠於饌前。俛伏。興。少退。立。太祝持祝版進。北面。跪讀文。訖。奠版。俛伏。興。退。復位。皇帝哭踊再拜。諸王妃主及羣官在位者皆哭再拜。皇帝哭十五舉音。訖。禮儀使跪奏。請復位。俛伏。興。皇帝退。復龍輜後位。禮官各贊。羣官止哭。通事舍人分引出。

就承天門外位以俟。光祿卿帥齋郎徹饌以出。禮官一人朝服贊尙輦奉御帥所由以腰輿。繖扇詣神座前。各以序立。內謁者中官昇香出。內侍捧几置輿上。內所由舉繖扇侍奉以出。中官帥其屬昇衣箱以從。遂詣玉輅。禮官於輅後立贊。登車內所由進輿。當輅後。繖扇分蔽左右。內謁者帥香案進於輅前。內侍奉几登輅。其腰輿亦進。居輅前。中官以衣箱授尙衣奉御。置玉輅及副車。內侍並乘馬從輅。於是侍中進龍輻南。跪奏稱請龍輻進發。俛伏興退。司徒帥挽士奉引次出。執事者以太常先建之於車。纛次之。公主內官以下。應合乘車者。並先升車以俟。扈從前三日所司設。皇帝奉辭。次於承天門外之左。西向其日金吾仗衛如常儀。鹵簿使先進玉輅於承天門外東偏。稍南輿。鞀鼓吹吉駕鹵簿。並序列於玉輅前。又進輻輳車。當承天門中。稍南。凶儀明器。序列於輻輳車前。奠前一刻。奉禮郎布文武羣官位於承天門外。異位。重行如太極庭中儀。光祿卿具遣奠之饌以俟。執事官位。並先俟於門外之東。龍輻至承天門外。禮官贊止哭。侍中進龍輻前。跪奏稱請升輻輳車。俛伏興。司徒帥昇梓宮官及所由。奉梓宮升輻輳車。所司設奠。席於輻輳車東。西向。奉禮郎設罇。坵於席東南。設壘洗。又於其南。設太尉版位於東。西向。禮官進省饌。訖。禮生贊。光祿卿捧俎進。跪奠於席上。諸齋郎捧俎。隨列於席上。禮生引太尉就位。禮官贊哭。在位者皆哭。又贊止哭。在位者皆止哭。禮生引太尉詣壘洗盥手。洗爵。詣罇坵所。太祝舉羣酌。醴齊。禮儀使就次。奏請皇帝出就次。皇帝出次。立於奠東。西向。太祝以醴齊授太尉。訖。禮儀使奏請皇帝去杖。前進。中官承傳止哭。諸王妃主等皆止哭。太尉以醴齊於皇帝之左。跪進。皇帝受醴齊。跪奠於饌前。俛伏興。少退。立。太祝持版。

進西北向跪讀祝文訖奠版俛伏興退復位皇帝哭踊禮儀使贊皇帝再拜諸王妃主及在位羣官等皆哭禮儀使跪奏請皇帝少退近侍扶皇帝少退於位少府監設讀哀冊褥於奠東禮官引冊案進舉冊官舉冊進至褥東西面以冊東向禮官贊太尉及羣官止哭中官承傳諸王妃主皆止哭禮官引中書令進跪讀冊訖俛伏興退復位舉冊者以授祕書監轉授符寶郎皇帝哭踊禮儀使奏請皇帝再拜太尉羣官諸王妃主皆哭再拜少府徹褥光祿徹饌訖禮儀使跪奏稱輻輳車將發皇帝前哭盡哀禮儀使稱再拜奉辭俛伏興皇帝稽顙哭踊再拜輻輳車發禮儀使跪奏請皇帝還宮俛伏興近侍扶皇帝入次太尉以下於次南橫行進名再拜奉辭訖各就本職如諸王有故不赴山陵者俟皇帝奉辭入次後諸王進至輻輳之左以南爲上哭盡哀再拜辭妃主內官不去者於輻輳車後帷中哭再拜辭訖禮生贊侍中於輻輳車前跪請進發訖俛伏興山陵日依時刻吉凶二駕備列訖尙輦帥腰輿繖扇入詣神座前內侍捧几內謁者捧香爐各置輿上中官帥其屬昇衣箱以出神輿至玉輅後內常侍捧几置輅中輿等退就列中官以衣箱傳授尙衣奉御置於玉輅及副車中神駕動警蹕如常千牛將軍夾輅而趨至侍臣上馬所禮生贊侍臣上馬侍臣上馬訖夾侍如前禮生在供奉官內諸侍衛之官各督其屬左右翊神駕動鹵簿官以黃麾麾之鼓吹振作警蹕如常當陵門以赤麾麾之鼓吹不作侍臣下馬步導於前駕至吉帷宮迴車南向尙輦帥腰輿繖扇至輅後內常侍奉几置輿上繖扇侍奉至帳殿下內侍捧几置座上內謁者捧香爐置座前輿等退就列玉輅及鹵簿侍衛之官停列於帷宮門外吉駕引禮官贊侍中進輻輳車靈駕前奏

請靈駕發引。俛伏。興。退。司馬執鐸。挽郎執紼。挽歌振作。及挽以進。內外哭從。以赴山陵。靈駕至陵門。西。凶帷帳殿下。迴駕。南向。公主及內官以下。並降車。障以行帷。哭於凶帳殿之西。東向北上。羣官皇親哭者。序立於帷門外。東西相向北上。哭十五舉音止。各退就次。前三刻。奉禮郎於隧道東南。量遠近。設皇親諸親。奉辭位。又於其南。設應從文武官五品以下奉辭位。又於其南。設六品以下奉辭位。每等異位。重行西面北上。設奉禮郎位於其北。禮生二人立於其南。差退。內謁者於隧道西南。稍北。帷內設公主王妃及內官以下奉辭位。東向北上。前一刻。所司設奠席於輜轅車前。設壘洗筐於東南。壘在洗西。筐在洗東。於是羣官列位序立。光祿卿帥其屬以饌奠於席上。禮官引太尉詣壘洗手。洗爵。詣罇坵所。太祝酌醴齋訖。太尉跪奠於饌前。俛伏。興。太祝持版進。太尉之左。跪讀文訖。奠版。俛伏。興。太尉再拜。在位者皆再拜。發引。至南神門。將作監進龍輅於靈駕之後。禮官贊侍中進輜轅靈駕前。跪奏。稱請降靈駕。御龍輅。俛伏。興。退。昇梓宮所由。乃奉遷梓宮至龍輅。昇梓宮官左右捧從。司空以巾拭梓宮。并拂夷衾。少府屬紼於龍輅。禮官贊侍中進龍輅前。跪奏。稱請引龍輅。卽元宮。俛伏。興。退。挽郎執紼。奉引龍輅。左迴。北首。禮官贊。司徒前導。白纈弩。素信幡。大旒。及鑿。皆依次而引。近伏。近侍夾進。如禮官導通事舍人引太尉。先導於龍輅之左。主節官帥持節者。脫節在太尉之前。差退。伏哭者。及挽歌。皆序立門外之西。重行。東向。押官排比以俟。皇親諸親。羣官等。哭從。公主。王妃。及內官等。障以行帷。龍輅至羨道。停於帷下。南首。以俟。時。妃主內官以下。於羨道西南帷內就位。東向。哭。通事舍人分引羣官。皇親。諸親。各就奉辭位。所由各贊。哭。在位者皆哭。其吉

鹵簿侍奉官少前序立於門外之東。西向北上。哭皆三十舉音止。再拜奉辭。至時內官以下吉服奉遷梓宮。入自羨道。奉接安於御榻褥上。北首。覆以御衾。龍輜退出。其押吉鹵簿官並服白布巾衫。就哭。將掩元宮。并依前服吉服。初梓宮降。自羨道。奉禮郎設太尉進寶冊。贈玉幣位。於羨道東南。南向。設禮儀使奉寶冊。玉幣位。於太尉南。又設祕書監位於其南。禮官導通事舍人引太尉以下。俱吉公服。各就位。又導持節者服節衣。引太尉之前。禮部侍郎奉寶授案。諡冊案。哀冊案。每案四人對舉。用九品以上清實官昇。立於太尉之西南。少府監奉贈玉。置於匣。帥其屬捧立於禮部侍郎之西。太府卿奉幣。元三纁二。置於篚。帥其屬捧立少府監之西。俱北面。各立於寶冊玉幣之後。案元衣纁裳。周制也。當時所服。故以爲幣服。近代及今。則皆不用。滯儒執古儀。注復存斯。未達禮從宜及隨時之義也。立定。禮官導通事舍人引禮部侍郎取寶授於案。進授太尉。又禮生一人引祕書監取諡冊。哀冊。進授禮儀使。其冊如重。則列官助舉。又引少府監取玉於匣。并薦巾。又引太府卿取幣。進授禮儀使。以幣承巾。玉。禮部侍郎以下並退。龍輜既出。禮儀官分贊。太尉禮儀使奉寶冊玉幣并降。自羨道至元宮。太尉奉寶授入。跪。奠於寶帳內。神座之西。俛伏。興。禮儀使以諡冊跪。奠於寶授之西。又以哀冊跪。奠於諡冊之西。又奉玉幣跪。奠於神座之東。並退出。復位。禮生引將作監。少府監入。陳明器。白臆弩。素信幡。嬰等。分樹倚於牆。大旒置於戶內。其跌竿燒之。自餘明器。各以次。遂便陳之。使有行列。陳布訖。并內官以下。並出羨道。就位。所由贊。內外哭。羣官。皇親。諸親。并吉儀侍奉官。皆哭。三十舉音。再拜。又再拜。奉辭。訖。引退。以出。中官贊。公主。王妃。並退出。周以行帷。至門。乘東。以屬從。禮生導主節官。帥持節者。引太尉。及司空。山陵使。將作監。御史一人。監纁閉元宮。司空復士九錡。所司帥作

終事。其先除服者並改服凶儀。鹵簿解嚴。退散。輜轎車龍輜之屬於柏城內。庚地焚之。其通人臣用者則不焚。將啓。太祝捧主匱置於座。啓匱於前。捧出神主置於座上。東向。諸侍奉官各退就位。輿轍等亦退。通事舍人引羣官俱退於太極殿門外。就次。以俟虞祭。所由陳仗衛如式。典儀設太尉。司徒。宗正卿。禮儀使。及諸行事官位於東階之東。設太祝等位於公卿之前。少南。如不親行事中。齊門下奏差攝。又少南設典儀位。俱西向。典儀帥禮生二人先就次。立禮生乃引太尉司徒以下祭服立於左延明門外之南。北向西上。光祿卿帥其屬捧饌立於太尉司徒之東。太祝帥齋郎奉祝版立於饌東。立定。禮生迺引太尉司徒以下入就位。通事舍人分引羣官。皇親。諸親。皆素服。各入就位。侍中版奏中嚴。皇帝素服就次。諸王升就位。如不獲親。光祿卿帥其屬捧饌入。俟於東階之前。太祝帥齋郎捧祝版立於其南。光祿卿帥其屬并設醴。無酒罇於帷門外。前楹中間之東。北向西上。設罇於罇西。實罇一杓。一皆有冪。設盪洗筐於東階之東。北向。盪水在洗東。筐在洗西。南肆實爵二巾。一有冪。執盪洗者立於其後。侍中版奏外辦近侍扶引。皇帝再拜。通事舍人分贊。羣官在內外位者哭拜。禮生引禮儀使省饌。訖升。就禮官升位。後光祿卿帥進饌奉饌。司徒捧俎。光祿卿引饌。及諸執事官並升自東階。設於帷東門外席上。訖降。復位。太祝捧祝版。升立於罇所。執罇筐者各立於罇筐之後。禮儀使導皇帝於饌東。西面。禮儀使跪奏。請皇帝止哭。奉奠。承傳內外皆止哭。太祝以罇酌醴。齊於皇帝之左。跪進。皇帝受醴。齊。跪奠於饌前。俛伏。與太祝持版進神座之南。北而跪讀祝文。訖奠版。俛伏。與禮儀使導皇帝復位。跪奏。請再拜。皇帝再拜。禮生引太尉亞獻。終獻。訖降。復位。如常儀。通事

舍人分贊。內外哭。再拜。禮儀使又跪奏。請再拜。俛伏。與皇帝哭。再拜。奉禮郎傳贊。內外再拜。禮儀使跪奏。禮畢。俛伏。與近侍扶皇帝還閣。羣官等俱退。太祝乃跪。置神主。遂閉帷門。降出。內侍之屬及行事者皆出。祝版焚於左。延明門外。百寮乃於太極門外奏慰如常儀。每虞日朝哭。禮皆準此。如不親行事則宗正卿亞獻。光祿卿終獻。神

廟前二日告遷。其禮如常告之儀。

宗正起科申牒所由。祝文出祕書省。

所由先備腰輿等并舁人。

帝以三衛充。后以中官充。

告訖。太尉先

置代祖神主。奉遷於西夾室。堦中鑱閉如式。次腰輿。遷第三室神主。

二主各一腰輿。凡主出則帝主先出。其入室則后主先入。

入第三

室。宮闈令捧后主。先置於堦室。太祝奉帝主。復置於堦室。俱東向。次遷第四室。入第三室。次遷第五室。

入第四室。次遷第六室。入第五室。次遷第七室。入第六室。

室有二后。昭成於前。肅明於後。

次遷第八室。入第七室。次遷第

九室。入第八室。皆如上儀。入堦室。皆鑱閉。訖。次所司移幄等物。依次各遷入本室。訖。其九室應緣幄帳。香

案。斧戾席褥等。所司先造。其日陳設於室中。其代祖室舊帳幄等物。並移於西夾室中。虛設鑱閉如式。將

遷代宗睿文孝皇帝。所司先擇日。奏定。散下。所由各供其職。應用法駕。鹵簿。黃麾。大仗。前一日陳設。及太

廟四門。量設方色。兵仗。如上儀。將作監先清埽諸廟內外。京兆府修路。從承天門向南。至太府寺南街。向

東。入太廟三門。又向南。又向東。至廟南門。宗正具耐饗料。差三公及應行事官齋戒。如常饗儀。其祝文具耐享意出

祕書省。

又巾太極殿。告靈座料。如前式。

其祝文出祕書省。

太樂令設登歌於太廟殿上。並如常式。尚舍於廟南門道

西。設神主幄座。東向。幄內設牀席褥。黼辰香案。如式。內中尚先造栗木主。并置及跌。其制度並如常儀。耐前一日

盛以箱。覆以帕。置於腰輿。詣廟南門。幄帳中。太祝捧置於座上。迺下簾帷。內侍省量。差中官侍衛。禮儀使

奏請差題神主官。卽以夔前一日。尙舍具香湯。并題神主席褥。內中尙具浴神主盆。并白羅巾。光漆筆墨等。詣於幄帳中。禮儀使與題神主官等。其日質明詣幄下。太祝以香湯浴栗主。拭以羅巾。題栗主官盥洗。捧栗主就褥。題云。代宗睿文孝武皇帝神主。墨書訖。以光漆重模之。遂捧授太祝。受詣帳座。置於匱中所侍衛如式。前一日。尙食與西內使計會鴻臚。除太極殿上白幕。並以吉幙代之。殿中省除版城。太僕進玉輅於承天門外。當中南向。及諸輦輅羽儀。仗衛繖扇。陳於玉輅前。左右金吾引駕。所由陳布如式。太常奏前一日之夕。嚴警於承天門外之南。皇城留守奏。祔饗日質明。開朱雀門。大內留守與內檢校使奏。開太極殿門。嘉德門承天門。衛尉於太極殿門外廊下。量設文武百官次。又於太廟南門外。量設百官次。於道東。如在太極殿庭儀。先奏靈座祔之日質明。宗正卿帥執饌齋郎。光祿卿帥大官。良醞寶罇俎籩豆。并應行事官。皆祭服。序列於左延明門。以俟。至祭時。應行事官詣太極殿東階下。西向序立。典儀於太極殿庭。布文武官皇親諸親位。如常儀。俟祭官欲升殿行事時。通事舍人引文武百寮等常服入就位。禮生贊衆官皆拜。在位者皆再拜。尙輦帥腰輿香案繖扇入詣殿庭階下。分東西立侍。從官攝侍中中書令以下。並列位於左右。序立。太僕進玉輅於嘉德門外。當中南向。禮生引祭官等行告禮。如常儀。告訖。宗正卿光祿卿帥齋郎長祠徹饌。禮官引侍中升尙輦帥腰輿升詣帳座前。其繖扇侍臣等夾於階間。侍中進跪於幄前。西向奏請降座。升輿祔廟。內侍奉几置輿上。太祝匱神主。捧置輿上几後。扶持降自西階。繖扇侍臣夾引以出自太極殿門中門出。在位文武百官及皇親諸親等。便從神輿而出。至嘉德門。分左右序立。神輿

至玉輅後侍中跪奏請降輿升輅內侍捧几置輅中太祝奉匱升輅

其太祝便於輅中侍奉

千牛將軍夾輅而趨出

承天門五十步侍中進當輅前跪奉請敕侍臣上馬侍臣等皆上馬鼓吹振作其文武百官等候玉輅出

承天門各逐便路先赴太廟南門次以俟神輿鹵簿至廟門西三門鼓吹止分左右以俟饗訖退其儀仗

等並於廟南門分左右列位俟饗禮畢退玉輅既發赴廟尙舍收拆殿上帷幄及板城等應合收者與檢

校使計會處置

四宮內入哀裳其日並焚之

其日太廟耐饗應緣齋官陳設罇彝酒醴坩爵省牲告潔進暑祝版陳設

樂器並如東饗常儀玉輅將至廟西門尙舍奉御設奉謁褥位於廟庭橫階南當中北向奉禮郎於廟南

門外稍南設文武百官及皇親諸親位如太極殿庭之儀又於廟庭橫階南設文武百官及皇親諸親位

亦準此

其六品以下非常參官並列位於廟南門外

通事舍人引文武百官及皇親諸親等常服就南門外位禮生引應饗官

俱祭服立於廟東門外北向西上位立又禮生引禮儀使御史以下執事官等先入當中階北向立於褥

位之南禮生贊再拜禮儀使御史以下皆再拜訖引自東階升各就位次引司空入就位再拜行掃除訖

降復位禮官與太祝自西第一室開堦室捧神主匱置於幄中近東啓匱出神主捧置於座几後踏上次

宮闈令入室捧后主匱置於幄中近西啓匱出后主置於座几後踏上自第一室至第八室皆如上儀訖

並齋郎室長各於本室依儀出入須知次序太祝退立於罇坩所宮闈令退就階下執事位玉輅既至廟

南門迴輅南向侍臣等序列於輅前神輿入幄則侍臣列於幄門外尙輦帥腰輿進輅後侍中跪奏請降

輅升輿詣幄座內侍捧几置輿上太祝捧神主匱置輿上几後遂昇詣幄座內侍捧几置座上東向太祝

捧匱置几後。訖。禮生於廟東門引行事。官大尉以下入就廟庭位。西向立。其殿上御史禮官太祝樂官等
各逐便自東西階下相向序立。候神主升殿。卻復階下位。侍中進於幄座前。跪奏。請降座升輿。耐謁內侍
奉几置輿上。太祝捧栗木主匱置几後。禮官引入。通事舍人引文武百官皇親諸親自南門外分左右從
入。就東西班位立。神輿至廟門。繳扇分左右立於門外。神輿至廟庭。褥位侍中各退就本班。其侍中未退太祝
捧匱跪置於褥。啓匱出神主。置於趺上。訖。侍中進於褥位西北面。跪奏。稱以今吉辰。代宗睿文孝武皇帝
耐謁奏訖。俛伏。輿退。少頃。侍中詣褥之西。東面。跪奏。請升輿。耐饗俛伏。輿退。降就本班。太祝進。跪於褥位。
捧神主匱於輿。其匱蓋亦置輿上近後腰輿既升。禮官奉引神輿。詣元宗室。太祝跪捧神主匱置東壁下。耐位褥上。
西南退立戶外。少頃。太祝進。就褥跪。捧神主置於輿。奉引入第九室。至帷座前。內侍捧几置於座。如幄中別有几
其几留於腰輿而退太祝捧神主。置於曲几後。趺上。以題處向北也其匱置於几東。近後。腰輿退於幄座之西。近北。昇腰輿
所由。並降自東階。由廟東門出。神主置座訖。禮生贊。再拜。太尉以下及應在位官。並再拜。禮生詣太尉之
左。白有司。謹具。請行事。登歌。奏永和之樂。九成畢。禮生贊。再拜。太尉以下及在位者。皆再拜。禮生引太尉
盥洗。執瓊升。詣從西第一室。酌鬱鬯。登歌作。太尉入室。神座前。裸訖。奠瓊於饌席。俛伏。興。退出戶。北向。再
拜。次引詣第二室。次引詣第三室。以至第九室。皆如上儀。訖。登歌止。引太尉降。復位。太祝奠毛血之豆。禮
生引司徒執俎。入自正門。俎初入門。雍和之樂作。饌升階。樂止。禮生徹毛血之豆。降自東階。以出。詣太祝。
取蕭蒿焚於爐炭。饌升設訖。齋郎降自東階。由廟東門以出。禮生引太尉盥洗。執爵奏。自第一室至第八

室各奏本室樂。至第九室奏保大之樂。行饗禮。亞獻終獻。並如常饗之儀。訖。降復位。登歌作。太祝各入室。徹豆。還罇所。登歌止。禮生唱賜胙。又唱再拜。衆官應在位者皆再拜。其三獻官不拜永和之樂作。禮生又唱再拜。在位者皆再拜。樂一成止。禮生進太尉之左。白禮畢。禮生引饗官自東門出。通事舍人引在位羣官南門出。太祝入室。各匱神主納於培室。如常儀。禮官帥腰輿詣廟門南幄下。太祝捧桑木生并匱。置於輿。遂自廟門南西偏門昇入。詣廟殿北簾下兩階之間。將作先具鉞鑊穿坎。方深令可容木主匱。遂埋之而退。明日百寮及皇親諸親詣延英門進名奉慰。如常儀。前二日內所司先具八升練布冠。衰裳腰經等。光祿卿具太牢饌。宗正進署祝版。前一日之夕毀廬爲聖室。高七尺五寸長丈二尺闊一丈將作監句當尙舍奉御設薄席於室內。內所由陳練冠於別次。其日依時刻內所由先入。整拂几筵。薦香燭於靈前。內外及百寮俱服衰服。去杖。通事舍人引就位。侍中版奏。外辦皇帝服衰裳。經去杖。近侍扶就位。西向哭。內外在位者皆哭。十五舉聲。禮儀使奏請再拜。皇帝再拜。內外在位者皆再拜。近侍扶皇帝就次。所司以練布冠衰裳進。內服訖。內外及百寮各服其服。兩省五品以上及卿御史大夫中丞尙書省四品以上諸司三品以上正員長官準禮合除首經練八升布爲冠以六升布爲衰裳今荆州布也其幘頭及衫袴等亦準此藏其所換初服以俟山陵時卻服。通事舍人引百寮入就位。立定。近侍扶皇帝就位。哭踊。內外百寮皆哭踊。光祿卿引饌升。設於靈帷前。太祝以爵酌醴酒。禮儀使奏請止哭。內外俱止哭。太祝以酒爵授禮儀使。禮儀使受酒跪進。皇帝受酒跪奠於饌前。俛伏興少退。太祝持版跪於饌前。近南北向讀祝版曰。維年月日子哀子嗣皇帝臣某敢昭告於考大行皇帝。天禍所鍾。攀號無及。以日易月。奄及小祥。煩冤荼苦。觸緒糜潰。謹以一元大武。

柔毛、剛鬣、明粢、薌合、薌其、嘉蔬、嘉薦、醴齊、祇薦、祥事、尙饗、讀訖、禮儀使奏請再拜、皇帝哭踊、再拜、內外在位者皆哭踊、再拜、皇帝還次、通事舍人引羣官退、其奉慰如常儀、祭前二日、內所司先具大祥服、淺黑純纁頭纁

子巾子大麻布衫白布腰帶麻鞋光祿卿具太牢饌、宗正進署祝版、前一日之夕、將作塗墍室、內所由陳大祥服於別次、

其日未明、內所由先整拂几筵、薦香燭於靈幄前、內外百寮俱服袞裳、去杖、至傳點時、通事舍人各引入

就位、侍中版奏、外辦、皇帝服袞裳、去杖、近侍扶就位、西向、哭踊、內外在位者皆哭踊、十五舉聲、禮儀使奏

請再拜、皇帝再拜、贊者承傳內外在位者皆再拜、訖、禮儀使奏請止哭、就次、變服、奏訖、與禮官等趨出、近

侍扶皇帝就次、變大祥服、內外百寮皆就次、變服、素服、訖、黑純纁頭腰帶白衫麻鞋各入就位、立定、近侍扶皇帝就位、

哭踊、禮官省饌、光祿卿引饌升、設靈幄前、太祝執爵酌醴酒、禮儀使奉引、皇帝稍進、詣饌前、禮儀使請止

哭、內外俱止哭、太祝以酒授禮儀使、禮儀使受酒、跪進、皇帝受酒、跪奠於饌前、俛伏、興、少退、太祝持版於

饌南、北向、讀祝文、訖、禮儀使奏請再拜、皇帝哭踊、再拜、贊者承傳內外在位者皆哭、再拜、十五舉聲、禮儀

使奏禮畢、與禮官等趨出、近侍扶皇帝還次、通事舍人引羣官序出、太極門、其奉慰如常儀百寮奉慰訖、以素服

詣延英門起居、謹奏禮云大祥素縞麻衣又云縞冠素紕既祥之冠今所司具淺黑純此即古之縞冠也案禮云禫而縗黑經白緯曰縗則宜施之於禫今於大祥服之蓋從當時宜其日

百寮早集西內、入就位、侍中進辦、並如大祥之儀、皇帝服大祥服、近侍扶就位、哭、十五舉聲、禮儀使奏請

再拜、皇帝再拜、贊者承傳百寮在位者皆再拜、禮儀使奏請就次、變服、皇帝就次、除大祥服、服素服、細布麻衫

腰帶細麻鞋黑百寮趨入、就位、立定、近侍扶皇帝入、哭踊、內外百寮皆哭踊、禮官省饌、光祿卿引饌升、陳

纁頭巾子等

設酌奠亦如大祥之儀。太祝讀祝文訖。禮儀使奏請再拜。皇帝哭。再拜。贊者承傳內外百寮皆哭。再拜。訖。禮儀使奏禮畢。遂與禮官趨出。近侍扶皇帝還次。通事舍人引百寮序出。至太極門外。進名奉慰訖。各服黻公服。便詣延英門起居。明日平明。皇帝改服黻吉服。淡淺黃衫細黑絁幘頭巾子麻鞋否腰帶伏準貞觀永徽開元故事服此服至山陵事畢則純吉服其中間朔望視朝及大禮並純吉服百寮亦純吉服。自後朝謁如常儀。其百官黻公服。至山陵事畢。乃服常公服。

文忠集拾遺卷二

對三命判

乙仕登三命舉以特牲祀以少牢人告其僭加於舉禮也

侑食以樂執恭展禮以辨等威以明貴賤乙以筮仕策名清朝從大夫之後既登三命循先人之祭有事十倫已而鏗鏘具舉和平不爽苾芬承祀明考之甯舉特且叶於禮經加牢未虧於祀典人告其僭罔知攸伏

案楊志堅妻求別適判

楊志堅素爲儒學徧覽九經篇詠之間風騷可撫愚妻觀其未遇遂有離心王歡之廩既虛豈遵黃卷朱叟之妻必去甯見錦衣污辱鄉閭敗傷風俗若無褒貶僥倖者多阿王決二十後任改嫁楊志堅秀才贈布絹各二十四米二十石便署隨軍仍令遠近知悉

訪求清河行人李華牒據殷亮撰行狀增

清河郡屬崔審交應賊之後吏不安行人李華乃崇墉浚隍鍛甲矯翦乞師破敵和衆以安之靜言其了須有甄賞

與李太保帖二首

千手贊檢得未帖之謹空。

惠及鹿脯甚慰所望。春寒承美闕一痊損。更加保愛。真卿有一二藥。煩宜常服。謹令馳納。少間借馬奉謁。不次。二十日顏真卿狀上太保大夫公閣下。

與盧倉曹帖二首

盧八倉曹足下。敍本甚是佳製耳。

足下今日定成行否。不得一至郊郭。深用悵然。珍重珍重。所欲拙書。今勒送十餘紙。望領之。忽怪弱惡也。不具不具。真卿。盧倉曹足下。

劉中使帖

近聞劉中使至瀛州。吳希光已降。足慰海隅之心耳。又聞磁州爲盧子期所圍。舍利將軍擒獲之。吁足慰也。

一行帖

真卿一行。昨自江淮。日趨百里。本期奉見。以慰遠別。疲於道路。且止數昔。但深攀仰耳。

南來帖

真卿承命南來。諸事草草。但賊勢尙爾。奈何。張貞□不了。國事可念可念。真卿。

江外帖

江外唯湖州最卑下。今年諸州水並湊。此州入太湖。田苗非常沒溺。賴劉尚書與拯。以此人心差安。不然僅不可安耳。真卿白。

草篆帖

真卿自南朝來。上祖多以草隸篆籀爲當代所稱。及至小子。斯道大喪。但曾見張旭長史。頗示少糟粕。自恨無分。遂不能佳耳。真卿白。

世系譜序

建中元年七月

顏氏之先。出自黃帝之孫安。爲曹姓。其裔邾武公。名儀父。字伯顏。子友。別封邾。爲小邾子。遂以顏爲氏。世爲魯國卿大夫。孔門達者七十二人。顏氏有八。回居四科之首。其後戰國有率躅。秦有芝貞。漢有異肆。安樂。魏有裴盛。盛字叔臺。歷青徐二州刺史。關內侯。其後子孫咸著宦族。有若宏都之德行。巴陵記室之書翰。特進黃門之文章。祕監華州之學識。肇自魯國。格於聖代。紛綸盛美。舉集於茲。述遵前人。不敢失墜。建中元年歲次庚申。秋七月癸亥序。

送福建觀察使高寬仁序

國家設觀察使。卽古州牧部使之職。代朝廷班導風化。而宣布德意。振舉萬事。而沙汰百吏者也。民俗之舒慘。兵賦之調發。刑獄之冤濫。政治之得失。皆得以觀察而行之。其任可謂重矣。江西貴溪高君寬仁。初舉明經。歷任中外。克勤職務。政績昭著。陞福建觀察使。夫君子之仕。不以位尊爲榮。而以盡職爲貴。福建

大藩也。其地東帶滄溟，南接交廣。居民若是其衆也。政務若是其煩也。職乎州郡者，果皆循且良，尙不能保其無一事之不舉，矧未必皆循良乎？弱之食，強之取，飢寒顛沛，而漁奪之不厭，則猷猷之民，若之何能求其安也？自古爲民之病者，多類此。是以居高位而欲下之安，其道難也。故衆皆以位高爲寬仁喜，予獨以盡職爲寬仁勉。所以盡職者無他，正己格物而已。忠君愛民而已。予與寬仁交久且厚，予所以望於寬仁者，豈但在於政事文字之間而已哉？振肅風紀，表儀一方，盡致君澤民之道，使聲名流芳史冊，茲行是望，於是乎書。

汎愛寺重修記

予不信佛法，而好居佛寺，喜與學佛者語。人視之，若酷信佛法者然，而實不然也。予未仕時，讀書講學，恆在福山邑之寺。有類福山者，無有無予蹟也。始僦居，則凡海印、萬福、天甯諸寺，無有無予蹟者。旣仕於崑時，授徒於東寺，待客於西寺，每至姑蘇，恆止竹堂。目予實信其法，故爲張侈其事，以惑沙氓，則非知予者矣。

湖州石柱記

烏程縣舊緊今望鄉四十里二百，東去蘇州二百一十里，南去杭州一百八十九里，西北去揚州六百四十七里，西去宣州三百一十七里，北去東都二千八百七十五里，北去上都三千七百七十六里，帝顓頊冢，吳大帝陵，吳景帝陵，鈕皇后陵，吳丹陽太守蕪湖侯太史慈墓，吳大將軍朱治墓。

吳蕩寇將軍程普墓 晉侍中羅含墓 晉黃門侍郎潘尼墓 齊宣城太守邱靈鞠墓 梁中書侍郎邱遲墓 梁司空康絢纘墓 陳五兵尚書康宗墓

長城縣

大雷山 芳巖 震澤 若溪 吳王夫槩廟 陳景帝陵 陳錢皇后陵 陳昭烈王陵 謝安墓 殷仲文墓 陳武帝故宅 陳文帝故宅 吳均故宅 陳氏五主屏風 陳高祖竹帳 國朝高僧 南山律主道宣

安吉縣

天目山 崑山 橫溪 梅溪 蛟龍池 翔鳳林 裴子野故宅 周宏讓故宅 姚萇雉尾扇 施世瑛金鐘

山川

卞山 法華寺 金井 玉澗 乳竇 石膏 溫泉 項王走馬埒 項王飲馬池 項王繫馬石 衡山 帝顓頊冢 春秋鳩茲城 峴山 顯亭 故別駕李適之石酒罇 五花亭 杼山 妙喜寺 黃浦橋 避它城 何楷釣臺 昇山 吳均入東記 晉吳興太守王羲之烏亭

金蓋山 何氏書堂 張邵邱道祚禪幽寺

太湖 周迴四萬八千頃

響溪

白蘋洲

項王碑陰述

西楚霸王當秦之末。與叔梁避讐於吳。蓋今之湖州也。雖滅秦而宰制天下。魂魄猶思樂茲邦。至今廟食不絕。其神靈事迹。具見竟陵子陸羽所載圖經。大歷七年。真卿蒙刺是州。十二載。姦臣伏法。恩命追真卿上都。尅期首路。竟陵是諗予。以故碑顛趾。嘗因仍草莽。已而復之。真卿乃命再加崇樹以紀之。時則仲夏方生明之日。

左納言史務滋像贊

嗚呼人方羅織。我獨平反。周來之徒。殺人以媚人。而卒亦不免。孔子曰。無求生以害仁。有殺生以成仁。而何嘗親密乎。行感國俊。臣慘刻吏。柄鑿不相入。當年公已矣。民到於今稱遺直。

永字八法頌

側蹲鷗而墜石。勒綏縱以藏機。弩灣環而勢曲。趨峻快以如錐。策依稀而似勒。掠仿髯以宜肥。啄騰凌而速進。磔抑趙以遲移。

蒲塘辨

土俗所呼博淺水浦與敷音轉爾南有博陽山土人呼爲濮陽山濮博聲訛水北有歷下村疑古歷陵也

周太師蜀國公尉遲公廟碑銘

開元二十六年

天臨有周誕赫元輔屏內藩外經文緯武隱若長城闕如虓虎功縣日月聲蓋寰宇甥舅之國君親是私一本誤作輔統蜀制梁督隴莅茲天命假易奸臣不祇憑陵君德暴蔑京師我圖匡救三方奮糾綠巾始繫黃龍失守精貫天地義伏羣醜節著誠全死而不朽皇唐御歷景命有融賜縑改葬懋烈昭忠鄰有賢守是爲張公馨香明德乃建闕宮乃建闕宮闕宮有恤乃建豐碑豐碑有崩妖孽遂止幽明載色戩穀無虧享祀不貳

華蓋山王郭二真君壇碑銘

粵以江南之地佳麗垂名山嶽之間宛有仙洞余祇膺聖澤廉察臨川一日按地理圖得屬邑崇仁縣華蓋山有王郭二真君壇存焉欣觀異事未原其始他日公餘因令軍將往山下訪求碑銘果得一石記乃隋開皇五年焚修道士李子真於壞碑上再錄出其文則知王郭二真君仙不顯名王則方平之從姪郭乃王之族弟也郭不應爲王之族弟族字疑誤始於金華山修道以圖輕舉尋遊洞府自玉笥山將之麻姑洞中道悅一山問故老曰此爲何山對曰巴陵華蓋山也二真君相與言曰此山福地名亦異焉因求卜止再煉神丹山下父老詣而再拜曰敢問真人之名字曰吾等修志於虛無不欲述焉後有一道士來謁敢問真人之

師曰。吾師浮邱先生。則上界大仙也。頃於金華山遇焉。二真君能走石飛符。興雲致雨。或有人疾苦暴亡。往而告之。卽飛符以救之。歲時大旱。卽致霖雨以濟之。至晉惠帝元康二年二月一日。綵雲連晝。仙樂喧風。二真君乃騖鸞駕鶴。冉冉上昇。今上昇之壇。及浮邱先生之壇存焉。其後立觀焚修。境邑將旱。若詣壇禱之。則雲雨立應矣。故事昭然。仙踪儼若。雖遺史籍。安泯聲華。鸞鶴對飛。共作壺中之客。林巒疊秀。別含象外之春。因與府官議崇觀宇。永利焚修。尋差軍將。以公用錢詣山。換殿宇門廊。不日而迴。云工畢矣。予德慚好道。任忝分符。原始要終。罕測沖天之日。飛文染翰。用貽終古之芳。銘曰。

元牝之門。澄心養神。學則彌衆。得者幾人。冉冉千古。堂堂二真。丹成巖谷。道應穹雯。綵雲色煥。仙樂聲勻。遲日初麗。柳花正新。騖鸞拔俗。駕鶴超雲。言歸紫府。笑別芳辰。山存華蓋。長含異春。恩流豐澤。用濟蒸民。浮雲世速。好月生頻。儼若聖祉。永播清芬。

晉侍中右光祿大夫本州大中正西平靖侯顏公大宗碑銘

大歷六年

公諱含。字宏都。瑯琊臨沂人。其先出於邾顏公。子友封於郟。是爲小邾子。爲魯附庸。居於鄒邑。因以命氏。孔門達者八人。曰路。回。辛。驕。祖。噲。僕。何。次有丁。闔。叔子。率躅。秦有芝貞。漢有肆異。安樂。魏有斐盛。盛字叔臺。青徐二州刺史。關內侯。始自魯居瑯琊。代傳恭孝。故號所居爲孝悌里。生欽。字公若。明韓詩。禮。易。尙書。多所通說。學者宗之。歷大中大夫。東莞廣陵太守。葛繹貞子。生默。字靜伯。晉汝陰太守。護軍將軍。生公少。有操行。以孝聞。兄畿。咸甯中死。託夢當復生。發棺而氣息甚微。闔家營視。母妻不能無倦。公乃絕棄人事。

駟驪侍養。足不出戶者十有三年。次嫂樊氏失明。須髻蛇膽。尋求不得。忽有青衣童子。持藥投公。公尋出戶。化成青鳥飛去。東海王越以爲太傅參軍。元帝過江爲丞相。祭酒東宮初建。公以儒素篤行。補太子中庶子。遷黃門侍郎。本州大中正。封西平縣侯。拜侍中。除吳郡太守。公所歷簡而有思明。而能斷。然以威風御下。王導歎曰。顏公在事。吳人斂手矣。未之官。復爲侍中。國子祭酒。光祿勳。以年老遜位。成帝美其素行。就加右光祿大夫。門施行馬。賜牀帳被褥。勅大官四時致膳。固辭不受。時論者欲爲王導降禮。馮懷以問於公。公曰。吾聞伐國不問仁人。向獨祖思問佞於我。我有邪德乎。或論少正卯盜跖惡執深。公曰。隱伏之姦。非聖不誅。衆咸服焉。郭璞嘗欲爲公筮。公曰。自有性命。毋勞著龜。桓溫求婚。以其盛滿不許。因誡子孫曰。自今任官。不可過二千石。婚姻勿貪世家。或問羣士優劣。答曰。周伯仁之正。鄧伯道之清。卜望之之節。餘則吾不知。致仕二十餘年。年九十二薨。諡曰靖。三子髦。謙。約。并有聲譽。公喪在殯。而鄰家失火。髦與二弟抱柩號叫。燦焰垂至。忽爾頓絕。時人以爲孝感。事見晉書。髦字君道。少纂家業。惇於學行。儀狀嚴整。風貌端美。桓公見而歎曰。顏侍中廊廟之望也。尙書郎國大中正。給事黃門侍郎。以父老不就。加給事中。晉陵臨川太守。侍中。本州大中正。加秩中二千石。光祿勳。西平定侯。事具約。孫延之。集生。琳。字文和。騎都尉。襲西平侯。生靖之。字茂宗。宣城太守。司徒諮議。御史中丞。生騰之。字宏道。善草隸。書有風格。治書御史。度支校尉。巴陵太守。生炳之。字叔豹。以能書稱奉朝請。輔國江夏王參軍。生見遠。字見遠。方正不合於俗。梁書云。博學有志行。齊治書御史。俄兼中丞。正色立朝。有當官之稱。高祖受禪。不食。發憤慟哭而絕。

武帝恨之曰。我自應天從人。何預天下人事。而顏見遠。乃至於此。生協字子和。湘東王記室。梁書有傳。生之推字介。北齊中書舍人。給事黃門侍郎。平原太守。嘗著觀我生賦云。展白下以流漣。以靖侯已下。七葉墳塋。皆在故也。生思魯。愍楚集序。思魯自作事見本傳。入隋。生遊秦。思魯字孔歸。博學善屬文。尤工詁訓。隋司經校書。長甯王侍讀。東宮學士。嘗與劉臻講論經義。臻屈服焉。高祖入關。率男師古相時。勤禮育德。奉迎於長春宮。授儀同秦王記室。國史溫大雅傳云。大雅在隋。與思魯俱在東宮。弟彥博與愍楚同直內史省。彥將與遊秦。并典校祕閣。二家兄弟各爲一時人物之盛。少時學業。顏氏爲優。其後職位。溫氏爲盛。勤禮字敬幼。而朗悟。識量宏遠。工於篆籀。尤精詁訓。祕閣司經史籍多所刊定。歷校書郎。著作郎。與兄師古相時俱以文學爲崇賢宏文館學士。太宗使蕭鈞讚曰。依仁服義。懷文守一。履道自居。下幃終日。德彰素里。行成蘭室。鶴鑰馳譽。龍樓委質。終著作郎。生昭甫字周卿。少聰穎。而善工篆隸草書。與內弟殷仲容齊名。而勁利過之。特爲伯父師古所賞。凡所注釋。必令參定焉。爲天皇曹王侍讀。曹王屬有獻古鼎篆書二十餘字。舉朝莫能讀。昭甫盡識之。贈華州刺史。真卿表謝。批答曰。卿之乃祖。嘗爲碩儒。旣高倚相之能。遂有臧孫之後。不墜其業。在卿之門。二子元孫。惟貞元孫字聿修。聰銳舉進士。考功郎劉奇特標榜之。歷太子舍人。專掌令書。元宗讚之曰。孔子亞聖。魯國稱賢。翰墨之妙。莫之與先。累至滌沂濠三州刺史。贈祕書監。五子春卿。明經拔萃。蜀縣尉。舉茂才。偃師丞。杲卿字旸。常山太守。祿山反。開土門。拜衛尉卿。兼中丞。贈太子太保。諡曰忠節。曜卿工草隸五言。以文學直崇文館。淄川司馬旭卿善草書。允山令茂曾篤行。頗

好詁訓。健爲司馬。惟貞字叔堅。有德行詞學。尤善草隸。屢登甲科。太子文學薛王友。累贈太子少保。事具陸據神道碑。七子闕疑。孝友仁讓。專精詩傳。杭州參軍。允南。孝悌聰銳。工爲詩判。屢入高等。與春卿。杲卿。曜卿。同日爲侍郎。席建侯所賞。歷左補闕。時真卿爲殿中侍御史。正至同拱法座。蹈舞而衣袂相接者三。故允南侍宴詩云。誰言百人會。兄弟也霑陪。累遷司封郎中。國子司業。金鄉男。喬卿。仁友。精音史。有吏道。富平尉。真長。清直。舉明經。幼與仁和有醜藉。精班漢。左尉。率府兵曹。真卿進士。校書郎。舉文詞秀逸。醴泉尉。清白名聞。長安尉。歷三院御史。兵部員外郎。以平原太守拒祿山。凡五爲侍郎。右丞。三爲尙書。四爲御史大夫。七爲刺史。二爲節度探訪觀察使。魯郡公。允臧。友悌。有吏幹。制舉縣令。宰延昌。拜監察。充郭子儀朔方衣資使。遷殿中太子中允。江陵少尹。再兼侍御史。充荆南節度行軍司馬。公子謙。安城太守。約。零陵太守。孫綸。廷尉。熙。散騎常侍。顯。護軍司馬。曾。孫系之。益州刺史。延之。金紫光祿大夫。劭之。領軍司馬。根。晉安太守。元孫希之。新安太守。師伯。僕射。師仲。中書郎。浚。吏部尙書。測。臨淮太守。奠。五兵尙書。微之。散騎常侍。僧度。給事中。僧超。徐州刺史。來孫幼明。征虜記室。昆。孫積。中書郎。翻。廣州刺史。仍孫誓。交州刺史。挺。山陽太守。雲。孫之儀。周御正中大夫。新野公。之善。隋葉令。侍讀。十代孫昶。甯。仁令。愍楚。侍御史。遊秦。度支郎中。廉州刺史。見循吏傳。著班漢決疑。頤。隋汝南侯。侍讀。十一代孫千里。工書。殷王主簿。師古。祕書監。宏文。崇賢學士。相時。禮部侍郎。天冊。學士。育德。太子通事舍人。司經局校定經史。利仁。祕書郎。有意。沔州刺史。博古。博學。延陵丞。十二代孫中和。渝州刺史。揚庭。蔣王侍讀。光庭。博學。注後漢書。涉令。趨庭。職方郎中。吉。

州刺史。欣期著作郎。益期詳正學士。敬仲仁孝。吏部郎中。平昌男。康成進士。太子舍人。崇文館學士。希莊進士。銀青和州刺史。日損。應制高第。大基尉。嘉賓。少有俊才。十三代孫大智。并州錄事參軍。隱朝進士。拔萃河北尉。匡朝。工五言。胸山令。元淑。鄰幾。景靈。并校書郎。同寅。明經。昇庠。有詞學。富陽令。恭敏。有德行。明漢書。武功尉。知微。制舉。伊闕丞。十四代孫溫之。有志行。舉方正。司門郎中。微之。澹之。並明經。冕。有清節。饒陽。司士。抱范縣尉。允濟。好屬文。榆次尉。振。高陵丞。搢。援。挺。據。揆。撰。并明經。挺。有詞理。萬年尉。式宣。清修。進士。殿中侍御史。茂齊。淳謹。漢州司法。舒。俊才。制舉。長安尉。說。明經。有才器。渭南丞。順。孝悌。進士。評事。勝。進士。左補闕。怡。好爲詩。渾。博涉有文。太子通事舍人。方僑。進士。宮門丞。十五代孫逸。好文。武康令。鱗。長安尉。廣成將軍。泉明。孝義。佐父開土門。彭州司馬。季明。子幹。翽。沛。頤。及外甥沈盈。盧泚。祿山反。死難。並贈五品官。勳。敦敏。通義令。覲。綿州參軍。顯。闕一西令。慈明。都水。穎。河南府功曹。校書郎。頴。孝明經。大理司直。頤。奉禮部。頤。江陵。頤。河中。顛。鳳翔參軍。頤。當陽主簿。願。千牛。頂。武功丞。頰。頰當是頰之誤工隸書。太子洗馬。頤。頰。並京兆參軍。顛。頤。頤已見前當是頤之誤顛。須。頰。頰。盈。枝。並未仕。通明。項城尉。詔。有才氣。工詩。策進士。濮陽尉。明。華陽尉。啓。溫江尉。襲。華陰尉。亞。邱。守道不仕。其餘枝派繁衍。不可具載。於戲。吾祖以志行純粹。感通神明。貽謀子孫。奕葉無改。其後忠義孝悌。文學才業。布在青史。粲然可知。非夫德盛流光。何能若是。真卿小子。懼不克荷。頃自撫州代到。獲展舊山。雖碑版沈淪。而印封儼在。敢揚不朽之烈。庶竭罔極之思。銘曰。

鑠吾祖。渡江浦。孝通神明。軼古凡七葉。葬白下。本支分源流。溥世忠義。疊規矩。鸞皇炳龍虎。文雖渙。學

鄒魯赫才明振區宇。亘今昔難悉數。嗟末孫慙下武。揚耿光。媿無取。豐碑立。百世覩。

祕書省著作郎藥州都督長史上護軍顏公神道碑乾元二年

君諱勸禮。字敬瑯。琅琊臨沂人。高祖諱見遠。齊御史中丞。梁武帝受禪。不食數日。一懣而絕。事見梁齊周書。曾祖諱協。梁湘東王記室參軍。文學有傳。祖諱之推。北齊給事黃門侍郎。隋東宮學士。齊書有傳。始自南入北。今爲京兆長安人。父諱思魯。博學善屬文。尤工詰訓。仕隋司經局校書。東宮學士。長甯王侍讀。與沛國劉臻。辯論經義。臻屢屈焉。學書黃門傳集序。君自作。後加隸岷將軍。太宗爲秦王。精選僚屬。拜記室參軍。加儀同。娶御正中大夫殷英童女。英童集呼顏郎是也。更唱者二十餘首。溫大雅傳云。初君在隋。與大雅俱仕東宮。弟愍楚與彥博同直內史省。愍楚弟遊秦。與彥將俱典祕閣。二家兄弟各爲一時人物之選。少時學業。顏氏爲優。其後職位。溫氏爲盛。事具國史。君幼而朗悟。識量宏遠。工於篆籀。尤精詰訓。祕閣司經。史籍多所刊定。義甯元年十一月。從太宗平京城。授朝散大夫。勳解褐祕書省校書郎。武德中。授右領左右府鎧曹參軍。九年十一月。授輕車都尉。兼直祕書省。貞觀三年六月。兼行雍州參軍事。六年七月。授佐郎。七年六月。授詹事主簿。轉太子直監。加崇賢館學士。官廢。出補蔣王文學。宏文館學士。永徽元年三月。制曰。君學藝優敏。宜加獎擢。拜陳王屬學士。如故。遷曹王友。無何。拜祕書省著作郎。君與兄祕書監師古。禮部侍郎相時齊名。祕監與君同時爲崇賢宏文館學士。禮部爲天策府學士。弟太子通事舍人育德。又奉令於司經局校定經史。太宗嘗圖畫崇賢諸文學士。命祕監爲讚。以君祕監兄弟不宜相褒述。乃命

中書舍人蕭鈞特讚君曰。依仁服義。懷文守一。履道自居。下帷終日。德彰素里。行成蘭室。鶴鑰馳譽。龍樓委質。當代榮之。六年以後。夫人兄中書令柳奭。親累貶夔州都督府長史。顯慶六年。加上護軍。君安時處順。恬無愠色。不幸遇疾。傾逝於府之官舍。旣而歸窆於京城東南萬年縣甯安鄉之鳳栖原。先夫人陳郡殷氏。暴柳夫人。同合祔焉。禮也。七子昭甫。晉王曹王侍讀。贈華州刺史。事具真卿所撰神道碑。敬仲。吏部郎中。事具劉子元神道碑。殆庶無恤。辟非少連。務滋皆有學行。以柳令外甥。不得仕進。孫元孫。舉進士。考功員外劉奇。特標榜之名。動海內。從調。以書判入高等者三。累遷太子舍人。屬元宗監國。專掌令畫滌沂濠三州刺史。贈祕書監。惟貞。頻以書判入高等。歷畿赤尉丞。太子文學。薛王友。贈國子祭酒。太子少保。德業具陸據神道碑。會宗。襄州參軍。考楚州司馬。澄。左衛翊衛。潤。涪城尉。曾孫春卿。工詞翰。有風義。明經。拔萃犀浦蜀三縣尉。故相國蘇頌舉茂才。又爲張敬宗劍南節度判官。偃師丞。杲卿。忠烈。有清識。吏幹。累遷太常丞。攝常山太守。殺逆賊安祿山將李欽湊。開土門。擒其心手。何千年。高逸。遷衛尉卿。兼御史中丞。城守陷賊。東京遇害。楚毒慘下。詈言不絕。贈太子太保。諡曰忠節。曜卿。工詩書草隸。十六以詞學直崇文館。淄川司馬。旭卿。善草。允山令。茂曾。納言。敏行。頗工篆籀。健爲司馬。闕疑。仁孝。善詩。春秋。杭州參軍。允南。工詩。人皆諷誦之。善草隸。書判。頻入等第。歷左補闕。殿中侍御史。三爲郎官。國子司業。金鄉男。喬卿。仁厚。有吏材。富平尉。眞長。耿介。舉明經。幼輿。敦雅。蘊藉。通班漢書。左清道率府兵曹。眞卿。舉進士。校書郎。舉文詞秀逸。醴泉尉。黜陟使王鉷。以清白名聞。七爲憲官。九爲省官。洊爲節度採訪觀察使。魯郡公。允臧。敦

實有吏能。舉縣令。宰延昌。四爲御史。充太尉郭子儀判官。江陵少尹。荆南行軍司馬。長卿。晉卿。邠。充國。質。多無祿。早世。名卿。偁。倂。倫。並爲武官。元孫紘。通義尉。沒於蠻。泉明。孝義有吏道。又開土門。佐其謀。彭州司馬。威明。邛州司馬。季明。子幹。沛。翊。泉明男。誕。及君外。曾孫沈盈。盧遜。並爲逆賊所害。俱蒙贈五品京官。濬。好屬文。翹。華。正。頤。並早夭。穎。好五言。校書郎。頤見後當是頤之觀家。廟碑云。頤好五言。核書。頤。仁。孝。方正。明經。大理司直。充張萬頃嶺南營田判官。頤。鳳翔參軍。頤。通悟。頤。善隸書。太子洗馬。鄭王府司馬。鄭王上一字。並不幸短命。通明。好屬文。項城尉。颯。溫。江丞。觀。絳州參軍。觀。鹽亭尉。頤。仁和。有政理。蓬州長史。慈明。仁。順。幹。蠱。都水使者。穎。介直。河南府法曹。頤。奉禮郎。頤。江陵參軍。頤。當陽主簿。頤。河中參軍。項。衛尉主簿。頤。左千牛。頤。頤。並京兆參軍。頤。須。頤。並童稚未仕。自黃門御正。至君父叔兄弟。衆子姪。揚庭。益期。昭甫。強學。十三人。四世爲學士。侍讀。事見柳芳續卓絕殷寅著姓畧。少監。少保。以德行詞翰爲天下所推。春卿。杲卿。曜卿。允南而下。息君之羣從。光庭。千里。康成。希莊。日損。隱朝。匡朝。昇庠。恭敏。鄰幾。元淑。敏。溫之。舒說。順勝。怡。渾。允濟。挺。式。宣。韶。等多以名德著述。學業文翰。交曠儒林。故當代謂之學家。非夫君之積德累仁。貽謀有則。何以流光末裔。錫美盛時。小子真卿。聿修是忝。嬰孩集慕。不及過庭之訓。晚暮論譏。莫追長老之口。故君之德美。多恨闕遺。
銘曰。闕。銘。

攝常山郡太守衛尉卿兼御史中丞贈太子太保諡忠節京兆顏公神道碑銘乾元二年正月
公諱杲卿。字昕。京兆長安人也。北齊黃門侍郎。諱之推之來孫。隋太子校書。東宮學士。皇朝秦王府記室。

參軍諱思魯之元孫。著作郎崇賢宏文館學士。贈虢州刺史。諱勤禮之曾孫。高宗晉邸侍讀。曹王屬。贈華州刺史。諱昭甫之孫。濠州刺史。贈祕書監。諱元孫之第二子也。公方正精敏。有清識。周旋有則。進止閒詳。起家江州司法。轉遂州。嘗爲刺史所責。公守正不爲之屈。時人稱之。遷鄭州司兵。開元與兄春卿弟曜卿。從父弟允南。俱從調吏部。皆以書判超等。同日於銓庭。爲侍郎席建侯所賞。翰林拭目焉。擢授魏郡錄事參軍。當官正色。舉劾無所迴避。採訪使張守珪。以清白聞。遷范陽郡戶曹。安祿山雅聞其名。奏爲營田判官。光祿太常二寺丞。又請爲節支判官。兼攝常山郡太守。天寶十四載。冬十一月。祿山反。范陽至棗城。公與長史袁履謙同謁。乃矯授公紫履謙緋。因令崇州刺史李欽湊。以兵七千人守土門。公罷歸。途中指章服諷履謙曰。與公受他色如何。履謙亦感激之士。遂與公定謀。翻之。恐事洩。潛使男安平尉泉明。往來計議。又使西通王承業。北結賈循。循敗。族滅。屬祿山使其心手高邈。往范陽。公使姪塔臺城尉崔安石。密伺其歸。以圖之。冬十二月二十日。以私號召。欽湊未至。會祿山害東京留守李愷。中丞盧奕。判官蔣清。傳首脇並海諸郡。前二日。真卿以平原太守。斬其使。令外甥廬逖。以購祿山。敕送於饒陽常山。後二日。逖至。公悲喜不自勝。猶未敢宣示。其夕。欽湊至。公俾參軍李峻。馮虔。靈壽尉李栖默。曩土人翟進玉。縋於城南門。密令驛長蔡行儀。醉以酒而斬之。履謙入告。公與相持而泣。喜其事之集也。遂使峻。栖默。開土門。又斬其副使潘惟慎。是夜。高邈迴宿浦城。公命馮虔。翟進玉。崔安石。馳捕邈。繫其肘而縛之。虔領赴郡。俄頃。體泉驛候騎報。何千年。發趙郡。安石以進玉。馳襲而擒之。如高邈。遂給以榮王琬。哥舒翰。官軍二十萬。入土

門告於列郡。遂使郭仲邕詐爲先鋒。以中官領御騎六十。徇以南諸郡。於是趙郡殺賊刺史馬道貞。鉅鹿殺劉杯。廣平殺郭子昂。曲州殺清河太守崔審交。皆以其首至。先是真卿守平原。而饒陽前聞景城。樂安。博平。清河。七郡。皆相與拒賊。至是博陵。上谷。文安。信都。鉅鹿。廣平。魏。趙。鄴。與常山十郡。皆卻爲國家守。乃使張通幽以兄通儒相賊。乞隨泉明以自雪。至太原。與尹王承業同惡。竊爲己功。留泉明等不遣。承業從弟隨中官入奏。皆蒙超獎。拜公衛尉卿。兼御史中丞。追赴京。以履謙爲太守。深爲司馬。泉明爲左金吾兵曹。制書未至。春正月。賊使平盧兵馬使史思明寇諸郡。思明旣來攻。六日城平。糧井皆竭。遂爲賊所陷。男季明。外甥盧逖。皆遇賊。遂以公履謙至東京。祿山讓公曰。我擢汝爲太守。何負於汝。而乃反乎。公曰。吾代受國恩。官職皆天子所與。汝叨受恩寵。乃敢悖逆。吾甯負汝。豈負本朝乎。臊羯胡狗。何不速殺我。乃繫公於天津橋南柱。令割肉以自噉。公詢詈不已。遂鉤以斷舌。問更敢爾否。公猶盛氣。含胡以應之。還被支解而終。觀者痛心焉。楊國忠受通幽詭說。賈深又不證明。竟不蒙恤。問乾元元年夏五月二十八日。肅宗乃追贈太子太保。子姪爲賊所害者八人。孫誕。姪詡。詡當從家廟勳禮二碑作翊。果卿之孫。從言旁名誕。其姪不應亦從言旁。蓋果卿姪有名翊。翊者其名從也。先質於賊。皆被鋸殺。至是贈季明。詡。左右贊善。誕。義王諮議。姪子幹。都水使者。沛。尙食奉御。頗。洗馬。也。羽旁。沈盈。大理正。封夫人。崔氏。清河郡太夫人。授泉明。鄆縣令。男威明。太僕丞。姪男翽。漢州司馬。孫証。左內倉曹。訊。兵曹。諡公忠節。從父弟國子司業允南。洎真卿。表謝。蒙批答曰。自逆胡猖狂。入我河縣。所在官吏。多所迫脇。卿兄以人臣大節。獨制橫流。或俘其謀主。或斬其元惡。當以援

兵懸絕。身陷賊庭。傍若無人。歷數其罪。手足寄於鋒刃。忠節形於顏色。古所未有。朕甚嘉之。盛烈既冠於當時。寵名宜及於泉壤。初公被懸首於右金吾街樹。有張湊者。哀其髮。收謁元宗。俄見夢云。禦捍處多兵馬少。元宗哭而設祭焉。後湊以髮至。夫人疑之。憑牀而哭。忽聞聲如鞭牀者。發箱跳而前。夫人方駭信之。明年春正月。葬於京城鳳棲原。先塋西北。禮也。昔七代祖中丞府君。『絕於梁武。五代伯祖御正府君。抗璽於隋文。而公精貫白日。義形宗社。今又繼之。爲不隕矣。嗚呼。公與真卿偕陷賊境。懸隔千里。稟義莫由。天難忱斯。小子不死。而公死痛矣哉。銘曰。

太保烈烈。抗茲忠節。殉國義形。見危身殺。元宗杖信。售詐凶羯。寵極災挺。稱兵向闕。河朔鼎沸。潼關晝閉。天下寒心。王旒若贅。虵豕十萬。萃如霜雪。公以眇身。毅然奮發。逆黨株送。士門披抉。人知効忠。國用不艱。恩寵三座。榮加九列。王命未臨。孤城已滅。身懸鋒刃。口冒不絕。先聖感忠。保儲贈揭。刻諸金石。思表墓綴。遠莫致之。留斯江滸。日月有旣。徽猷無缺。

文忠集拾遺卷三

正議大夫行國子司業上柱國金鄉縣開國男顏府君神道碑銘

寶應元年

君諱允南。字去惑。京兆長安人也。高宗侍讀。贈華州刺史。昭甫府君之孫。薛王友。贈太子少保。惟貞府君之第二子也。少以詞藻擅名。兼工草隸書。尤善五言詩。深爲伯父濠州刺史元孫府君之所賞愛。開元十五年。以挽郎選糊名。考判入高第。授鶉觚尉。後與從父兄春卿。杲卿。曜卿。調集。皆爲吏部侍郎。席建侯所賞重。時論榮之。尋授右武衛兵曹。二十六年。丁內憂。以毀聞。服闋。轉右領軍錄事參軍。與從祖姑子劉同昇。齊名。長又相善。嘗寓書與之。中書舍人孫逖見而驚歎曰。古人之作。尋爲同昇。江南經略判官。遷大理評事。從調吏部侍郎。達奚珣。以書判超等。薦爲朝廷左補闕。元宗嘗撰華嶽碑。并書。天寶九載。令御史大夫王鉞。打百本。以賜朝臣。家獲二本者。四族。而君以兩省官。弟真卿。以殿中侍御史。居其一焉。每正至朝賀。宰相以下。登殿者。不過三十人。而君與真卿。王鉞。法服於含元殿。蹈舞而衣接焉。朝覲宴集。必同行列。故君賦詩云。誰言百人會。兄弟皆霑陪。與諫議大夫鄭審。郎中祁賢之。每應制。及朝廷唱和。必警絕。佳對人人稱說之。俄遷殿中侍御史。以忤楊國忠。貶襄陽丞。移河東司戶。京兆士曹。十五年。長安陷。輿駕幸蜀。朝官多出駱谷。至興道。房琯。李煜。高適等。數十人。盡在中丞田良印。爲哥舒翰行軍司馬。旣敗。猶自振矜。因誦表云。翰比行師。未當挫衄。蓋緣運數潛迫。人神同棄。職之人故。匪翰之由。衆皆默然。君獨抗聲叱之。

曰。公何得尙爲賊說徵祥乎。頡等因欲毆擊。魏仲犀與之同罪。遜詞引去。不敢枝梧。一座皆壯之。恩詔召拜尙書屯田員外郎。加朝散大夫。遷司膳郎中。真卿至自河北。元宗給君驛。至鳳翔。令相見。從肅宗入西京。遷司封。真卿以尙書兼大夫。弟允臧。又爲殿中。兄弟三人。同時臺省。當代無比。時人欽羨焉。尋封金鄉縣開國男。累加正議大夫。上柱國。遷國子司業。寶應元年冬十一月。真卿自利州蒙召至上都。君遇疾已革。闕而泣曰。吾忍得見汝。因哽咽不自勝。其十日。傾逝於私第。享年六十九。嗚呼。明日庚申。葬於萬年縣鳳棲原。先塋之北。祔也。二子穎。頻。皆好爲五言詩。真卿使頻奏事彭原。上文章。蒙擢校書郎。早卒。穎。簡直。潔己。以左衛兵曹選爲侍郎。崔器所賞。累授河南府士曹。噫。君幼而聰明。長而美秀。仁恕形於造次。精識冠於當時。善與人交。篤於僚友。故父執侍郎寇公泚。相國陸公象先。尙書韋陟。陸公景融。重君才名。相見未嘗不移日也。相國房瑄。尙書韋陟。張倚。皆篤忘年之契。河南陸據。彭城劉鍊。劉秩。隴西李揆。河東裴士淹。特敦莫逆之歡。河東敬括。隴西李華。李涵。范陽盧允。畢盡常僚之好。非夫親仁誠物。泛愛虛己。則何以廣而能周。久而益敬者矣。家常有折脛鶴。初真卿小年。時戲書其背。君切責曰。此雖不能奮飛。竟不惜其毛羽。奚不仁之甚歟。其惻隱者如此。真卿終身志之。於戲。以君之才之美之德之義之方當翼亮盛時。儀型宗國。道之祝喪。頓我遠圖。悲乎痛哉。真卿孩而不夭。太夫人蘭陵郡太夫人殷氏。親自鞠育。實賴慈訓。粗茲有成。至若發慮學文之親。立身復禮之道。非仁兄之規誨。曷暨所蒙。且有師訓之資。豈惟孔懷之戚。布哀金石。未究萬分。銘曰。

莊嶽熊渾。清沂駿奔。英靈孕育。生我仲昆。維我仲昆。邦家之藩。孝仁是履。愷悌是愷。清識冰澈。韶儀玉溫。司華藻絢。翰墨雲繁。通究理體。精詳政源。爰初發跡。屢振瑤琨。尉邑何陋。評廷不冤。袞衣補闕。繡服榮敦。神州列掾。會府掌屯。司膳王封。迴薄飛騫。乃佐教胄。載光儒門。未登館鼎。奄謝鴻鴛。伊昔不造。實賴能存。下光花萼。上潔晨飧。微君教導。曷惠拯援。今既絕矣。哀摧忍言。何以寘懷。勳銘弗諼。垂諸來裔。翼子謀孫。

和政公主神道碑銘

廣德二年八月

詩美下降。傳書築館。貴其中禮。載籍稱焉。漢魏已還。寂寥罕嗣。以蕩陵德。則維其常。皇唐勃興。王道丕變。平陽起娘子之軍。於司竹。襄城行匹庶之禮。於宋公。常樂紜匡復之師。於武后。皆前古之所有。其或生知禮樂。周旋法度。躬行婦道。以懋大倫。克順天經。光照懿烈。名言之所莫究。書記之所未聞。聚衆美於一身。鄰太虛而獨立者。其唯和政公主乎。公主姓李氏。隴西成紀人。皇唐玄宗至道大聖大明孝皇帝之孫。肅宗文明武德大聖大宣孝皇帝之第三女。帝女之崇。於斯爲盛。今天子之同母妹也。母曰章敬皇太后。后之在襁褓也。后父贈太尉吳君曰。今珪嘗遊官蜀中。使道士句規占之。驚起曰。此女貴不可言。是生二子。男爲人君。女爲公主。嫁於柳氏。其後竟配肅宗。生今上及公主。神所命也。厥惟舊哉。公主三歲而孤。卽能孺慕。育於儲妃韋氏。純孝過人。幼而聰慧。長而韶敏。穠華秀整。令德芬馨。婉嫕發於天姿。肅雍形於鑒寐。奉今上以悌道。事韋如所生。繇是特爲肅宗之所賞愛。至若左右圖史。開示佛經。金石絲竹之音。績畫工巧之事。耳目之所聞見。心靈之所領略。莫不一覽懸解。終身不忘。天寶九載春三月。旣望。封和政公主。降

於河東柳潭。既筭之三載矣。潭周太保敏之五代孫。皇蘄州刺史懷素之曾孫。贈祕書監岑之第四子。衣冠地胄。輝映當朝。初以美秀承家。中以名聲華國。道勝而貴。能下善謙。尊而休。有烈光士林。偉之解褐。左內率府胄曹。轉潁王府戶曹。陳留郡司功參軍。以人門第一。選尙公主。拜太子洗馬。亦既好合。雅相敬貴。雖柳侯秉彜有度。能降帝女之心。而公主率履由衷。每抗古人之節。故宗族胥睦。不獨親其親。先後大同。莫敢私其子。伯姒宏農楊氏太真姊。務華采。公主服無金翠之飾。居有冰雪之容。每至朔月六參。朝天旅進。嫣然班斝之內。迴出神仙之表。亦非希企之所及也。暴凶羯亂常。潼關不守。元宗幸蜀。妃后駿奔。姊曰甯國公主。霜嫠屏居。誰或訃告。乃棄其三子。取其夫之乘以乘之。柳侯徒行。公主愧焉。下而同趨者。日且百里。每臻坎險。必先濟甯國。而後從之。柳侯辭。公主曰。我若先涉。脫有危急。不能俱全。則棄我姊矣。柳侯感歎。躬負薪之役。公主怡然。親饋餼之事。竭力供侍。潭兄澄之妻。楊貴妃之姊也。貴倖前朝。勢傾天下。公主交無諂黷。思未綢繆。楊且云亡。以孤見託。馬嵬之役。無瞧類焉。感其一言。悉力營贍。男登服冕之位。女獲乘龍之匹。出入存恤。過於己子。雖其密親。罔或能辨。柳之親昵。伯仲姑姊。隱觀將迎。唯恐不至。糾遯蔬屬。撫循惻愛。繇內及外。終始如一。孤窮滿日。榮悴殊倫。居薄推厚。未嘗懈倦。衣服飲食。等無有差。恆或未周。嬰孩罔及。每至伏臘。禱祠蒸嘗。必具禮衣花釵之飾。以躬中饋。堂室之奠。豈無婢使。式燕孫謙。姿性純儉。不以迄成。先聖休之。寶書清問。秋八月。元宗至蜀。仍舊邑。而冊公主。以潭爲駙馬都尉。銀青光祿大夫。太僕卿。屬狂將興禍。稱兵向闕。元宗親御闔闈。臨視誅討。駙馬率領家豎。折衝張義童等。鬪於門中。公主

及甯國。穀弓迭進。駙馬乘勝突刃。所向無前。斬馘擒生。殆逾五十。節使時宰。具以表聞。元宗自繫詰示。先帝懇讓。莫當策勳。遂寢。今上之爲元帥也。躬擐甲冑。率先將卒。舉兩京若拾遺。摧凶寇如振槁。勞旋方及。弩藏其空。公主貿遷有無。億則屢中。闕羸優而數逾千萬。懼不給。悉畀縣官。論者難之。肅宗彌留。衆皆迭侍。主獨瞻奉。不已於旁。帝有問。疊而謂之曰。汝之純孝。乃能至是。遂賚莊一區。帝愛季女曰寶章公主。因奏曰。八妹未有。請以賜之。泣而諫焉。哀動左右。西陵遷窆。上戒主曰。凡厥親身之物。必誠必信。勿之悔焉。主罄家有無。以邑入千萬。潛羨經質。上深感歎焉。上既宅亮陰。未忍臨政。人之疾苦。事之得失。豈嘗私謁。動必以聞。上敬異之。朝廷賴焉。廣德元年冬。上既東幸。主志期扈蹕。迴兵充斥。咫尺不通。因至荆南。尉薦諸將。方隅載謐。職貢以修。主有力焉。上之在陝。憂主匱乏。乃命中使。屢敕節度及轉運使。隨主所須。務必肅給。主以國用空罄。退而歎曰。吾方竭家財以資戰士。其能饜饕。首冒國經。唯請名香數斤。賦於佛寺。爲主祈福而已。王公戚屬。相攜而至者。藍縷膩囊。襁負鱗次。竭其闕斧。親自瞻恤。聚而泣之。悲感行路。初次商於頓。於傳置。羣盜蝟起。奄譁驛亭。呼而犒之。曉以禍福。一言革面。願比家人之死靡他。至今猶在。緬惟罔極。無所寘哀。從母薛氏。遺孤數四分。宅居之。皆俾成立。萊莘兄弟。盡列通班。二女有行。克配良士。主之慈忠。悉皆若是。親臨稼穡。躬儉節用。不憚煩縟。雅好組紉。駙馬裳衣。必親裁紵。爰及子女。罔衣綺紈。綻新皆成主手。每加訓誨。蠡迪檢押。廣德二載春二月。歸於上都。諸主高會。議際夫黨。覲其親族。多曠周旋。咸以爲時經百罹。粗略可也。主抗詞曰。女之移天。遂成他族。怙貴長傲。何以律人。上方理定。聞必不悅。諸主

蹙然競崇討習禮之降殺親之薄厚。翕然一變職主之由。夏六月才生魄。屬邊候不謹。烽及京師。城中震驚。圍視無色。主既彌月。體未甚安。曰事亟矣。其入言之。駙馬請問。主曰。吾業已行矣。駙馬獨無兄乎。因乘檐子。直至寢殿。乃悉索闕遺。備陳利病以奏之。上欣然嘉納。所言未究。傍或員來。因爾退歸。遲明誕育。展轉悵惘。不能弭忘。時屬炎暵。熱疾有加。聖情憂軫。起坐失次。天醫內官相繼旁午。彼蒼不惠。以其月二十有五日辛卯。薨於常樂坊之私第。春秋三十有六。嗚呼。皇上友愛天深。痛毒兼至。嗚然一叫。聲淚俱咽。哀動木石。豈伊人倫。漣漣孔懷。如失於臂。曰余此妹。國之鴻寶。方期闕云如何。運祝降時喪。天實爲之。胡甯忍予。乃輟朝三日。命京兆尹監護喪事。一以官供。務從優厚。柳侯搢膺永悼。氣索神傷。心苦而忽然忘生。泣盡而繼之以血。況乎五男三女。或亂或孩。呼阿母而哭無常聲。籲昊天而仁覆永絕。哺以滋旨。噓而莫就。其爲酸痛。曷愈於斯。以是思哀。哀可知矣。自朝及野。知與不知。聞之失聲。罔不震悼。棧有青牛。素服輓輓。主之薨也。踏地哀鳴。仰天屑淚。三日不餼。畜猶若是。臣僕可知。主之將薨。馭馬先殞。捐館之夕。見夢別墅。乘之周麾。偏勞慙遺。俾屏不逮。田客僉從數騎。久已云亡。衆皆驚起。髣髴猶見。雖所憑則厚。而精氣何多。主於駙馬。大義敦肅。不特倪天之貴。每極家人之禮。駙馬雅性夷簡。恬於名利。願究衛生之經。庶臻久視之道。主志深婉順。始慕真宗。故於他時。並受法籙。嘗謂之曰。易崇積善。詩貴起予。不以忠孝數事。迭相告勸者。則心有慊焉。率而行之。曷嘗廢墜。又以爲死生恆理。先後之間。若幸啓手足。必當縱我以道服。瘞我於支提。往來行言。時見存恤。則所懷足矣。予若不諱。我若沒身未亡。灑掃塋隴。出入窳窳。奉君周旋。噫。

嘻於斯之時。以爲謔浪。豈悟今者。皆符昔言。有司奉詔。將厚其禮。駙馬疏陳。皆蒙允許。粵以秋八月十九日。甲申。暴其男。試太常少卿。賜紫金魚袋。晟。鴻臚少卿。暈。試祕書丞。賜紫金魚袋。杲。試殿中丞。昱。暴子三女等。虔窆。公主於萬年縣。義豐之銅人原。從理命也。於戲。風詠歌衣。史稱彤管。纖微之善。載籍猶稱。況乎七葉帝女。分形歸妹。貴能上下。忠以導躬。備德言容。功之美。服女師母儀之訓。訂之繇古。孰與我京。昔馬遷著記。謂之實錄。有道見述。亦云無愧。某學於舊史。少識前載。歷考長代。跋彼疑之盛。未有如公主者焉。雖壺則家風。每挹如賓之敬。而勤崇垂懿。敢忘傳信之辭。銘曰。

穠矣公主。元元之緒。聖皇之孫。肅宗之女。今上之妹。生人之矩。德言容功。義仁孝忠。溫良恭儉。敬讓宏通。率履弗越。高明有融。下嫁於柳。猗那自久。金石著明。琴瑟斯友。家道以正。人倫斯厚。鳳凰于飛。梧桐是依。雍雍喈喈。福祿攸歸。和樂旣孺。德音莫遠。麟之趾定。振振子姓。方紹母師。奄摧邦令。一人痛毒。九有違詠。詔葬於河。銅人之阿。支提鬱起。宰樹誰過。空餘好合。來往滂沱。

朝議大夫守華州刺史上柱國贈祕書監顏君神道碑銘

永泰元年

君諱元孫。字聿修。京兆長安人。高祖諱之推。北齊給事黃門侍郎。待詔文林館。曾祖諱思魯。隋太子校書。東宮學士。皇朝秦王記室。祖諱勤禮。著作郎。崇賢宏文兩館學士。父諱昭甫。高宗侍讀。曹王屬。贈華州刺史。俱以德業才名。相望史冊。君卽華州之元子。少孤。養於舅殷仲容家。身長六尺二寸。聰銳絕倫。工詞賦。章奏。有史才。明吏事。年十歲時。叔父吏部郎中敬仲。任益府法曹。長史李孝逸。聞君少俊。請與相見。座中

試安石榴賦。君默綴少頃。郎中聘而從之。君授翰立就。不加點竄。孝逸大驚。尤善草隸。仲容以能書爲天下所宗。人造請者。牋盈几。輒令代遣。得者欣然。莫之能辨。舉進士。素未習尙書。六日而兼注必究。省試九河銘。高松賦。故事。舉人就試。朝官畢集。考功郎劉奇乃先標榜。君曰。銘賦二首。旣麗且新。時務五條。詞高理贍。惜其帖經通六。所以不闕。原本 屈從常第。徒深悚怍。由是名動天下。解褐鼓城主簿。歷登封尉。與弟贈太子少保諱惟貞。府君調選。屢以高等。同登甲科。相代爲長安尉。翰林偉之前是老吏。好以婚田之不決者。試新上官。君悉操階上。研墨汁數。原本 操割凡百餘道。不終夕而畢。縣令隴西李綰。才學士也。原本 駭命小吏分守寫之。而通不給。朝廷聳歎。遷洛陽丞。著作佐郎。太子舍人。時元宗監國。獨掌令誥。當時以爲綸言之最。嘗有命召。或以次進。原本 今日非也。聞公喚長舍人來。遂御小殿。賜食。因出諸家書跡數十卷。曰。聞公能書。可爲寡人定其真僞。君分別以進。上元宗大悅。因賜藤牋筆墨衣服等物。嘗和遊苑詩。御札八分批荅云。孔門入室。魯國稱賢。翰墨之妙。莫之與先。君一覽無遺。兼該故實。韋安石以宰相兼庶子。特相禮重官務。一以諮君。事頗填委。從駕至。原本 以司直用事。命坊官同遊石龕寺。駐焉。諸君有忌前者。曰。顏舍人必不行。已而君辭以遽。曰。果爾。何爲妄請。君默然。元宗登極。同列皆選中書舍人。君讓范陽盧備。俄爲瑀等所擠。出爲潤州長史。遷滁州刺史。按察使王志愔。以清白名聞。拜沂州。志愔娶於顏。餘慶以男求婚。君拒之。遂誣奏。請降階奪祿。其初。君與執事者。闕 一官有忤。至是憾焉。遂黜歸田里。君屏私第。傲然無悶者十年。與陳郡殷踐猷。上谷寇泚。武功蘇晉。吳郡陸象先。友善。相見未嘗不畢景。起爲濠州刺

史累加朝議大夫。上柱國。中書令張嘉貞。澹相器重。方引知制誥。原本右職。屬罷相不行。代到風疾。停家。開元二十年秋七月。才生明。薨於絳州翼城縣丞之官舍。隨子春卿任也。明年葬於東京鶴店東北高村。原夫人新城縣君元氏。故兆異穴。而塋權也。文集三十卷。著于祿字書一卷。並行於世。續祖父涉。令光庭。注後漢書。常山之陷也。沒焉。廣德二年春三月二十有二日。制曰。故濠州刺史上柱國顏元孫。懿道淳茂。宏材特達。傳經成業。聚學爲文。清白著於家風。問望光於銓選。久膺揚歷。爰寄藩條。政有其方。績宣其用。未登大任。遽迫流年。九原不作。郡邑存其遺愛。二子象賢。艱難立其名節。忠能徇國。孝在榮親。贈以儒官。揚其盛烈。可贈祕書監。真卿表謝。今上批答云。卿之先伯。當代詞宗。道蘊國經。行推人表。上宏祖德。下獎門閥。鄭國不亡。臧氏有後。雖雲雨之澤。自葉流根。然訓誨之方。因父見子。永惟盛烈。式寵代官。不朽者名。斯爲極矣。嗚呼。君有五子。皆有才名。春卿聰銳無比。早擅詞賦。尤工表檄。倜儻有吏能。急人之急。明經拔萃。歷蜀縣尉。長史蘇頌舉茂才異等。未試。充張敬忠節度判官。轉翼城丞。與弟杲卿。曜卿。從父弟允南。調選。同日於銓庭。爲侍郎席建侯所賞。授偃師縣丞。杲卿忠烈方正。精敏有識。累至魏州錄事參軍。清白名聞。充安祿山營田及度支判官。太常丞。攝常山太守。祿山反。誅其土門使。原本拜衛尉卿。兼御史中丞。城陷。詢。爲賊所屠害。乾元中。贈太子太保。諡曰忠節。曜卿介直。以信稱。勤學好屬文。工草隸書。十五以文學直崇文館。每選集。必爲主司所賞。擢歷城丞。淄川司馬。旭卿美姿儀。善草書。允山令茂。曾仁恕。和厚。口無擇言。頗屬文詞。留心詰訓。嘉陵司馬孫紘。少好雜書。疎財重義。方義尉。鮮于仲通。節度劍南。引爲判

官同征閣羅鳳。沼於蠻。泉明穎悟。孝義果銳。嫻於吏道。安平尉。父敬保。父敬保字疑是太保之謄。果癩。贈太子太保。故云。將開土門。使與長史袁履謙往來謀議。授左金吾兵曹。尋爲賊所執。舉家見陷。泉明到河北乞求贖。先姑女而後己子。行路哀之。東京收復。泣血求父屍。獲焉。時人以爲孝感所致。拜郟令。有能名。爲崔光遠所擠。終彭州司馬。威明太僕丞。邛州司馬。季明惇敏。有容止。與君外孫盧逖同爲賊所害。贈左贊善。濬勤學好屬文。早卒。子幹。剛銳強力。公劉府果毅。弟沛。同遇賊害。贈都水使者。沛尙食奉御。翹入道。翹當從家廟動禮二碑作翹。果癩之姪也。與泉明子誕同質於祿山。皆被鋸殺。贈贊善。誕義王諮議。翽通義令。覲漢州參軍。觀鹽亭尉。珣觀未仕。曾孫証。右內倉曹。訊兵曹。詔彭王參軍。皆承謀翼。不敢失墜。爲君德盛才茂。行周業廣。文可以經國。道可以致君。而坎壤盛明。不登弼亮。其時歟。其命歟。真卿越自嬰孩。特蒙獎異。且兼師父之訓。豈獨猶子之恩。濡筆告哀。不申萬一。銘曰。

琅琅世父。明德是矩。孝以仁親。忠期輔主。周旋禮法。精究訓詁。行琳珪璋。文彪龍虎。高標天府。震耀區寓。前載闕。原本千官欽覲。王畿就列。赤縣斯偃。杖華交輝。灑翰如雨。洛陽毗貳。著作布武。載筆龍樓。闕。一光龜

組。元宗褒異。闕。一發儔伍。不入掖垣。翻飛江濟。淮沂其乂。典憲斯侮。望閉爰歸。優游不吐。名公虛左。濠上

爰撫。方俟同昇。遽愆多祐。一麾屢黜。百贖奚補。翼子多方。教忠則靡。吁嗟太保。爲國干櫓。取義舍生。悲今邁古。皇恩自葉。超贈祕府。存沒哀榮。幽明赫眈。真卿追痛。銜恤靡怙。牽綴銘功。恨非觀縷。

朝請大夫行江陵少尹兼侍御史荆南行軍司馬上柱國顏君神道碑銘

大歷四年四月

君諱允臧字季甯京兆長安人曹王晉王侍讀贈華州刺史昭甫府君之孫薛王友贈太子少保惟貞府君之第八子也孝悌惇敏有才幹局力所居以吏道稱解褐太康尉太守張倚採訪使韋陟皆器其親嚴與之均禮天寶十載制舉縣令對策及第授延昌令君悉心致理遠者懷而邇者安採訪判官賈至王倫言於使清白名聞會安祿山反遂止潼關陷太守李揖計未有所出君勸投靈武至甯朔屬同羅招六蕃府絕不得通肅宗聞君誠至德初追赴彭原行在所拜監察御史賜緋魚袋遂承任使推勦不避強禦中官邢延恩等皆得罪焉尋充朔方兵健衣資使郭公子儀請爲判官清渠之覬也賊兵四合矢下如雨君挺劍躍馬奔之得出自武功知縣御史及吏人無敢住足君徐坐示暇於大遠然後少有至者因令具頓以候今上上大驚喜引之同食河東人郭俊邢韶翻城歸順郭公俾君先入郡以安恤之郭公旣至軍郡之事一以咨君隨方決遣無不欣愜有郡人嘗爲賊將崔乾祐判官郭公欲加刑君領證左右以入救遂貰之二年秋八月遷殿中侍御史真卿表謝肅宗批答曰卿昆季連擢才聲並振俱守寒松之操允執後彫之心久冒艱危大知難奪委以憲臺之長克申白簡之威厥弟之遷亦爲官擇宜相勸勉各樹能名當代榮之京城收與崔禕銜命宣撫都人大悅出爲樸陽令錄事有奸犯者君立榜殺之豪強震恐一縣屏息遷侍御史以當爲郎以兄在南省君遂攜揖牢讓轉大理正用法精詳或以賄財執事而妄訴者卿丞莫能止君獨召訊詰責立服衆皆爲君危之寶應中復拜侍御史兼太子中允廣復三年冬十月拜江陵少尹又兼侍御史荆南行軍司馬君清正卓立特爲軍州所敬旣而代到屢詔徵入未得行大歷三年冬

十一月五日乙亥。奄忽感暴疾。終於私第。春秋五十九。其兄真卿聞喪哀摧。甚去手足。乃命姪男前武功丞頂。諡於其妻奉明縣君韋氏。其孤前京兆參軍頴。景頴。禹等。以明年夏四月壬戌。歸祔君於上都萬年縣鳳棲原先塋之北。禮也。嗚呼。君姿質瓌博。襟靈沈粹。心根德義。躬服孝仁。理以居家。果於從政。與人深一定之分。臨事多獨見之明。屢佐戎旃。必聞忠益。六登憲府。皆推直諒。信可謂朝之正人。儒之君子。未申殿邦之用。遽齋入冥之恨。知與不知。孰不嗟悼。真卿疊深祜薄。門祚衰陵。同生之人。零落皆盡。唯形與影。相視不足。豈圖不造。永訣於斯。長號立銘。泣盡繼血。其辭曰。

嗟嗟予季。特稟純粹。曰孝與仁。因心則至。友由悌睦。禮用和貴。她她美言。嶽嶽高義。行絕枝葉。心無頗詖。經德秉彝。拔萃出類。環衛入侍。牽絲作尉。泛愛與人。檢莊莅事。一作象雷。六爲天吏。豪右宣威。憲臺增氣。羣公虛左。天子思媚。守挹讓郎。得仁奚媿。司刑棘寺。理法昭賁。儲闈載升。亞尹斯位。七德繫理。萬人攸旣。黃髮未登。青雲方致。云如不淑。奄忽云諱。國失重寶。家摧脛臂。以此思哀。我生奚寄。反葬何所。先塋之次。濱水東流。終峯北摯。勒銘金石。威烈無墜。

左衛率府兵曹參軍賜紫金魚袋顏君神道碑銘

大歷四年四月

君諱幼輿。字令軌。京兆長安人。高宗侍讀。贈華州刺史。昭甫府君之孫。薛王友。贈太子少保。惟貞府君之第六子也。美容止。有器度。故小名粲焉。孝悌仁和。精詳禮法。博涉史記。漢書。盡究其義理。起家后土齋郎。調補汝南郡新息縣主簿。恪謹官次。備聞修潔。紀綱吏人。罔弗畏慕。太守趙國公王瑀。器君才名。待以殊

禮縣之庶務悉以見咨家素清貧從母之孀孥者宗族之惇單者皆仰給焉君悉心奉養情禮彌篤哥舒之攻石堡城請君隨軍拜左衛率府兵曹參軍恩敕賜緋魚袋不幸以天寶九載秋七月旬有三日遇疾而終春秋四十八卽以其月窆於萬年縣鳳棲原先塋西北禮也夫人陳郡殷氏蘭陵郡太夫人之兄子充曹州司法麗正殿學士踐猷之元女高士永甯尉寅之女弟高士壽安尉亮之家姑也我伯舅聰明純粹博學稽古相國陸象先祕書監賀知章景我世父濠州刺史元孫府君友善呼爲五總龜龜千年而五總問無不知也太夫人以君四世殷之自出原本失其新命君娶之旣而遂焉成先志也夫人含風孤映當世以廣德二年廣德止二年舊本作三年冬十月二十一日棄牀帳於江陵仲子鳳翔參軍顓景季子頓不幸早夭大歷四年夏四月壬戌季弟真卿命君孟子前武功丞頂叔子左千牛願度遠日而合祔焉嗚呼君以全德之姿丁休明之運宜其振翼層漢濯鱗清流而位不準才德淪於天吁足慟也謂之何哉銘曰

兵曹樂只於穆不已華州之孫少保之子溫溫體度嶷嶷容止非禮勿言唯德是揆人倫領袖宗廟簠簋佩服典常顯精文史汾睢歲事新息入仕忠益上官總持綱紀奉養從母必窮珍旨綏族紜宗羣居咸喜哥舒授律石堡俟倚命我翊戎寵章斯被鯤溟未運鴻漸伊始不與之年云如何瘞安放安仰嗣徽昭美合葬旣遵從周有斐于嗟窳束不獲躬視寫恨立銘告哀千祀

杭州錢塘縣丞殷府君夫人顏君神道碣銘

君號真定琅琊臨沂人北齊黃門侍郎之推府君之元孫皇朝秦王記室思魯府君之曾孫著作郎宏文

崇賢學士勤禮府君之孫。皇曹王侍讀贈華州刺史昭甫府君之季女。錢塘丞殷履直之妻也。聰慧明達。發乎天性。孝仁敬讓。迥出人表。精究國史。博通禮經。問無不知。德無不備。其在家也。九族仰其壺儀。其移天也。六姻賴其任恤。天后當宁。旁求女史。太夫人殷氏。以彤管之才。膺大家之選。召置左右。不遑顧復。二弟曰祕書監元孫府君。太子少保惟貞府君。藐焉始孩。頃隔怙恃。君躬自誨育。教之詩書。悉擅大名。皆君力也。叔父吏部郎中敬仲府君。爲酷吏所誣。君率二妹宜芳。令裴安期妻。司業岑獻妻。割耳訴冤。因獲減死。及誕男成已。而左耳缺焉。君有三子。長曰武康丞嘉紹。尤工小篆。爲寸字飛白。勁利絕倫。紹子塔郎。中柳芳。今之良史。芳子太樂令冕。幼立盛名。次曰處士齊望。有成人之姿。幼曰晉州長史成已。雅善填書。兼綜才藝。鳴謙勇退。不登清秩。每與文士族祖濬武。平一。呂因。李嘏。陳齊卿。族舅斤朝。內弟曜卿。允南。姨弟劉瑾。族弟寅。同賦詩。多擅警絕之句。六女。長適李氏。生安陸令銓。孝養於君。次適王元淑。著漢春秋。次適蔡九言。生燕學士。闕爲當代之冠。次適顏昭粹。粹女適司勳郎。闕才器爲海內。闕楊欽。生濯。季淮。幼適我兄闕疑。仁親友悌。有闕度。爲尼感殊。闕慈明。及女聘。真卿童孺時。特蒙君教。言辭音剖。闕延壽。王孫賦。崔氏飛龍篇。江淹造化篇。五都賦。不幸開元二十五年秋七月有五日。以隨牒終於成。已尉氏尉之公館。享年八十四。粵以明年春正月。合祔於東京萬安山之王寶原禮也。嗚呼。君全德內充。慈仁外被。才明可以升博士。法度可以律母師。雖偕老不俱。無石筭魚軒之貴。而長筵律慶。多鏘鳳乘龍之歡。於足云也。真卿不敏。夙承誨誘。追深仁而莫逮。謀不朽其庶茲。銘曰。

於惟我姑德盛才備受深倫育耳割冤蘇惠及疎賤仁涵朽枯子孫宴喜龍鳳相趨教我音辭王孫五都
期頤未究人世俄殊刻石墳阿聲流八區

橫山廟碑

神居武陵其地有湖每出則神獸前道形如白馬

水亭詠風聯句

清風何處起拂檻復縈洲清 回人飄華幕輕來疊晚流楊 桃竹今已展羽袞且從收楊 經竹吹彌切過
松韻更幽左輔 直上青蘋末偏隨白浪頭陸士修 山山催雨過浦浦發行舟櫓 動樹蟬爭噪開簾客罷愁陸羽
度弦方解慍臨水已迎秋真 涼爲開襟至清因作頌留清 周迴隨遠夢騷屑滿離憂耿 豈獨銷煩暑偏能
入迴樓喬王風今若此誰不荷明休陸涓

溪館聽蟬聯句

高樹多涼吹疎蟬足斷聲楊 已催居客感更使別人驚楊 晚夏猶知急新秋別有情櫓 危湍和不似細管
學難成陸 羽當敷附金重無貪耀火明真 青松四面落白髮一重生耿 向夕音彌厲迎風翼更輕喬單嘶出
迴樹餘響思空城清 嘒唳松間坐蕭寥竹裏聲伯 如何長飲露高潔未能名清

斷句

人心無路見時事只天知書奉使帖後

逸文存目

勅滎陽鄭延祚停母喪三年不葬疏

奏金吾將軍李延素召蕃客內宴引駕仗不報疏

薦安陵處士張鎬疏

奏范陽節度使安祿山反狀疏

奏安祿山反范陽至洛陽疏

招河北太守賀蘭進明討賊書

上靈武蠟丸疏

再上蠟丸疏

論宰相元載奸狀疏

上所著韻海鏡源表

上選舉利害事宜疏

右見殷亮撰行狀

乞致仕第一疏

乞致仕第二疏

乞致仕第三疏

右見舊唐書德宗紀

請修東都太廟祔主疏

志云長慶六年吏部郎中鄭亞等請修祔主與建中元年禮儀使顏真卿所奏事同

遺表

自祭文

自爲墓誌銘

右見新唐書本傳

梓材賦

右見留元剛撰年譜公二十六歲試進士時作

文殊師利菩薩碑

右見公書文殊帖僧皎然有觀立此碑時

江州祖亭記

右見歐陽詹弔九江驛碑材文

臨川自沈碑

右見沈顏碎碑記

湖州射堂記

和州刺史張敬因碑

右見集古錄

工部尙書郭虛己碑

富平尉顏喬卿碑

大斌令殷攝碑

顏默碑

顏允南妻陳夫人碑

慈恩寺常住莊地記

右見金石錄

元宗賢妃盧氏墓誌銘

華州刺史顏顯甫碑

右見寶刻叢編

撫州刺史張景倩清德頌

禪林寺智者禪師畫像讚

廣德軍橫山廟碑

撫州元子哲遺愛碑

右見輿地碑目

題大聖慈寺盧稜伽畫壁

右見益州金石記

元武湖記

旌儒廟碑

東莞臧氏故宅碑

右見古今石刻碑目

魯郡太守張府君碑

右見古今碑錄

與柳冕帖

右見梁溪集

逸詩存目

庫詩

案留元剛撰年譜云公二十六歲試進士賦此。

過皎然郭中山寺 同王員外圓宿皎然寺 同袁侍御高皎然上人登杼山上峯 同李侍御導皎然

上人游法華寺 修韻海畢會諸文士東堂重校 開元寺經藏院立文殊師利菩薩碑 同袁侍御

高駱駝橋翫月 九日登水樓 修韻海畢州中重宴 同皇甫曾西亭重會韻海諸生 登峴山送

張侍御嚴歸臺 峴山送李法曹陽冰西上獻書 清明日同皎然游因送蕭主簿存 餞宣諭蕭常

侍穎士 修韻海畢東溪泛舟餞諸文士 泛舟送皇甫侍郎曾 送李侍御粵 觀元真子置酒張

樂舞破陣畫洞庭三山歌元真子張落元真子舴艋舟歌 清風樓送吳練師筠歸林屋洞 晦日

同皎然集白蘋洲以上諸詩皆魯公在湖洲

經古烈士左伯桃墓下作墓在溧水縣

和元真子漁父詞公與陸鴻漸徐士衡李成矩共和張志和漁父詞共二十五首今惟志和詞存見緘仙傳

送挺贊上人歸翠微寺詩見盧綸

案魯公為吉州別駕時有廬陵集十卷為撫州刺史時有臨川集十卷為湖州刺史時有吳興集十卷

見於唐書藝文志及行狀墓誌然則公之詩亦甚夥矣歷年既遠而所存止此蓋不及什之一也今并

以見於他人詩目者載於卷後以俟能詩者為擬作之資亦廣徵補亡之意也

文忠集拾遺卷四

年譜宋留元剛撰

中宗景龍三年己酉。

公生於是年。其先琅琊臨沂人。晉侍中西平靖侯含之十四世孫。含以孝義儒學名家。居丹陽。五代祖之推。北齊黃門侍郎。始爲京兆長安人。高祖思魯。隋司經局校書。東宮學士。長甯王侍讀。唐太宗爲秦王。拜記室參軍。曾祖勤禮。著作郎。崇賢宏文館學士。祖昭甫。晉王曹王侍讀。華州刺史。父惟貞。薛王友。贈太子少保。

四年庚戌。六月改元唐隆。是月睿宗卽位。七月改元景雲。

睿宗景雲二年辛亥。

三年壬子。正月改元太極。五月改元延和。八月傳位玄宗。改元先天。

先天二年癸丑。十二月改元開元。

玄宗開元二年甲寅。

二十二年甲戌。

公年二十六。考功員外郎孫述下進士及第。試梓材賦庫詩。

二十四年丙子。

公年二十八。平判入等。授朝散郎。祕書省著作局校書郎。

天寶元年壬午。

公年三十四。舉文詞秀逸科。元宗御勤政樓策試上第。十月授醴泉尉。後黜陟使王琪以清白名聞。轉通直郎。遷長安尉。按本傳及神道碑。天寶初以制策甲科。作尉醴泉。考唐會要所載諸科。如文詞秀逸。皆謂之制舉。通直郎。自武德定令。爲從六品。朝散郎從七品。

五載丙戌。

公年三十八。是歲有張長史十二意筆法記。

六載丁亥。

公年三十九。正月遷監察御史。尋充河東朔方軍試覆屯交兵使。

七載戊子。

公年四十。是年充河西隴右軍試覆屯交兵使。

八載己丑。

公年四十一。又充河東朔方軍試覆屯交兵使。劾奏朔方令鄭延祚。八月遷殿中侍御史。時中丞宋渾。爲御史吉溫崔珪誣告。譎賀州。公面折之。楊國忠黨於溫。怒公不附己。令溫諷中丞蔣冽奏公爲東都

探訪判官。按史傳。溫性陰詭。詔事貴官。以訊獄深虐。李林甫才其爲擢戶部郎中。兼侍御史。又媚附楊國忠。安祿山。高力士。爲國忠謀奪林甫權。誣奏京兆尹蕭旻及渾。逐之。皆林甫所善。林甫不能救。後祿山領河東節度。表溫自副總留事。拜雁門太守。以母喪解表爲魏郡太守。國忠當國。引拜中丞。十三載。祿山薦爲武部侍郎。國忠與祿山爭寵。溫轉厚於祿山。國忠忌之。發其賊狀。遂斥死。宋渾之謫。當是溫兼侍御史時也。家譜以公遷殿中。在五月。今從行狀。

九載庚寅。

公年四十二。十二月遷侍御史。

十一載壬辰。

公年四十四。三月轉武部員外郎。判南曹。

十二載癸巳。

公年四十五。楊國忠以前事銜之。繆稱請擇。出公爲平原太守。按十三載。有東方朔畫贊碑陰記云。去歲拜此郡。則以是年出守明矣。案請擇。黃本作精擇。

十三載甲午。

公年四十六。十二月有東方先生畫贊碑陰記。

十四載乙未。

公年四十七。轉兵部員外郎。時安祿山反。河朔盡陷。獨平原城守具備。使司兵參軍李平馳奏。元宗始聞亂。嘆曰。河北二十四郡。無一忠臣耶。及平至。大喜。顧謂左右曰。朕不識真卿何如人。所爲乃若此。謹按公嘗爲殿中侍御史。與仲昆左補闕允南同列臺省。每朝賀。宰相已下登殿者不過三十人。公與允南二拱法座於含元殿。朝覲宴集。必同行列。夫以拱承天辟。執憲殿中。久賜清問。參陪左右。不爲疏逖者矣。平原出守。才三年耳。已有不識之間。元宗末年。怠荒。蠱於妖嬖。昏昧至是。安得不稔胡雛之禍哉。十五載丙申。七月。肅宗卽位。改元至德。

公年四十八。正月。加戶部侍郎。兼平原郡太守。三月。兼河北招討採訪使。七月。拜工部尙書。兼御史大夫。平原郡太守。河北招討採訪處置等使。有皇帝卽位賀上表。皇有修書帖。十月。史思明使尹子奇圍河間。公遣和琳往救。思明逆戰擒之。河間陷。又使康沒野波將先鋒攻平原。公謀於衆。賊銳不可抗。乃渡河。

肅宗至德二載丁酉。

公年四十九。四月。朝於鳳翔。授憲部尙書。有讓表。六月。兼御史大夫。有謝表。新史行狀。月日不同。今從家譜。九月丁丑。廣平王俶平西京。十月壬戌。平東京。癸亥。肅宗發鳳翔。丙寅。入西京。太廟爲賊所焚。肅宗素服向廟哭三日。按本傳。兩京復。公建言。春秋新宮災。魯成公三日哭。今太廟爲賊毀。請築壇於野。皇帝東向哭。宰相厭其言。十一月。出爲馮翊太守。有謝上表。

三載戊戌二月改元乾元

公年五十三。三月除蒲州刺史。有謝上表。四月有謝晉王曹王侍讀贈華州刺史表。按通鑑。杲卿姊妹及泉明之子流落河北。是年公守蒲。使泉明往求之。九月有祭姪贈贊善大夫季明文。十月除饒州刺史。有華嶽廟題名。至東京拜掃。有祭伯父豪州刺史文。豪州按通典。春秋末鍾離子之國。晉僑置徐州。安帝時爲鍾離郡。宋廢入南兗州。齊置北徐州。北齊爲西楚州。隋開皇二年以地枕濠水。更曰濠州。自大業至唐武德。天寶。乾元。改爲郡。若州者。再地理志謂濠字初作豪。元和三年改從濠。元和郡國志。濠字中開誤去水。元和三年字又加水。彭晁社亭記碑陰載武德開州印豪字。而不從水。元和二年刺史崔公中奏請依舊以濠水爲州名。三年八月敕豪從水。省司重造新印。攷之濠州乃開皇舊名。武德以後始作豪也。今舊集作濠。誤。當從碑本。

乾元二年己亥

公年五十一。有顏司徒碑銘。六月爲昇州刺史。充浙西節度使。兼江甯軍使。有謝表。江甯郡以元年改置昇州。兼浙西節度觀察使。是年有與蔡明遠帖。李侍御寫真贊。有天下放生池碑銘。按放生池碑陰記及碑銘所載。皆在二年。湖州碑陰記後。迺書作二年三月。攷之乞御書碑額表云。去年各任昇州刺史。日述碑銘一章。自書絹本。附史元琮奉進。乞御書題額。以光揭不朽。緣前書點畫稍細。恐不經久。今謹據石壁窠大書一本。奏進。特乞聖恩俯遂前請。然則碑銘必是年所作。而再進壁窠之本。在於次年。

故繫以改書之歲月耳。藝文類聚有梁元帝荊州放生亭碑。世謂放生建碑始於唐。非也。三年庚子閏四月改元上元。

公年五十二。時劉展將反。公豫飭戰備。李暄以爲生事。非短公。二月追爲刑部侍郎。有乞御書天下放生池碑額表。八年貶蓬州長史。按離堆記。以言事忤旨。本傳云。上皇遷西內。公率百官問起居。李輔國惡之。行狀神道碑又謂爲御史中丞敬羽所誣。然二事皆在公貶貳之時也。

上元二年辛丑。九月去年號。稱元年。以十一月爲首歲。

元年壬寅。復以建巳月爲四月。改元寶應。是月代宗卽位。

公年五十四。五月有鮮于氏離堆記。拜利州刺史。屬匡賊圍城。不得入。追赴上都。十二月劉宴讓爲戶部侍郎。有謝表。有顏司業碑。

寶應二年癸卯。七月改元廣德。

公年五十五。三月改吏部侍郎。有謝表。八月除江陵尹。兼御史大夫。充荆南節度觀察處置使。有謝表。未行。授代。十月轉尙書右丞。有臧尙書碑銘。

代宗廣德二年甲辰。

公年五十六。正月以檢校尙書兼御史大夫。充朔方行營汾晉等六州宣慰使。招諭僕固懷恩。不行。遂知省事。二月有與李太保帖。十一月有與郭僕射書。郭公廟李臨淮碑銘。按郭英義爲尙書右僕射。封

定襄郡王。驕蹇侈汰。陰事元載。魚朝恩。以久其權。明年嚴武死。以英義爲成都尹。充劍南節度使。自以有內主。肆志無有所憚。崔旰反。英義奔靈池。普州刺史韓澄殺之。是月又與李太保帖。

永泰元年乙巳。

公年五十七。八月有孫述文公集序。閏十月有與李太保帖。有顏祕監碑銘。

二年丙午。十一月改元大歷。

公年五十八。時元載多引私黨。畏羣臣論奏。乃給代宗曰。羣臣所奏。多挾私讒毀。請自今論事。先白長官。長官白宰相。宰相定可。否。然後奏聞。公有百官論事疏。攝事太廟。言祭器不飭。載以爲誹謗。二月。貶峽州別駕。時又有廟享議。朝會有故去樂議。三月。移佐吉州。道出溧水。有吊烈士左伯桃詩。六月。有東林寺西林寺題名。歐陽公脩集古錄。按唐書。公爲元載所惡。貶峽州員外別駕。撫州湖州刺史。載誅。復爲尙書。而不言其再貶。至新史始載本末。蓋攷諸碑陰記及題名也。

大歷二年丁未。

公年五十九。正月有鮮于少保碑銘。十月有靖居寺題名。守政帖。廬陵集十卷。

三年戊申。

公年六十。五月除撫州刺史。按魏夫人麻姑華姑仙壇記。乞御書題額。恩敕批答碑陰記。並存。是歲家譜誤作二年。當以記爲據。有書馬伏波語。

四年己酉。

公年六十一。四月歸。祔季弟少尹于上都。時同生十人。零落皆盡。惟公獨存。有寶應寺翻經臺記。魏夫人華姑仙壇碑銘。

五年庚戌。

公年六十二。五月有麗正殿學士殷君墓碣銘。十二月有宋開府碑銘。

六年辛亥。

公年六十三。三月有寶應寺律藏院戒壇記。閏三月臨川代到。四月有南城縣麻姑山仙壇記。是年有晉侍中西平靖侯顏公大宗碑。又有左輔元編次所賦爲臨川集十卷。

七年壬子。

公年六十四。有八關齋報德記。九月至東京。除湖州刺史。十一月發東京。有與夫人帖。

八年癸丑。

公年六十五。正月至任。七月追建放生池碑銘。按杼山妙善寺碑云。大歷七年。蒙刺是邦。觀察判官御史袁君高。巡部會於此上。遂立亭於東南。陸處士以癸丑歲冬十一月癸卯二十一日癸亥建。名之曰三癸。又云。自典校時。著韻海鏡源。未遑刊削。壬子歲。叨刺于湖。公務之隙。與沙門法海。李寧。陸羽。褚沖。湯某。柳察。潘述。裴循。蕭存。陸士脩。楊遂初。崔宏。楊德元。胡仲。湯涉。顏祭。韋介。左與宗。顏策。以季夏於州。

學及放生池討論。至冬徙於茲山。來年春遂終其事。攷之乞御書題額。恩敕批答碑陰記。公七年秋九月歸至東京。起家除湖州刺史。來年春正月。至任。放生池碑後。亦書云。七年秋九月己亥。蒙除不應。壬子之九月。至京。癸丑之正月。至任。而壬子之季夏。已與羣士討論於州學。冬復徙于杼山。癸丑之春。遂成書而終事。碑銘曰。三癸嶙峋。又曰。紛吾著書。羣彥惠臻。言羣彥著書於三癸之亭也。夫既大歷七年。蒙刺是邦。癸丑十月。方有此亭。安得壬子之冬。羣彥已集。是必寺碑傳寫於金石剝落之餘。誤以癸丑爲壬子。當終事於甲寅之春也。郡有韻海樓。未徙杼山時所建。是年有題三癸亭。誦陸處士折青桂花。見寄詩。水堂送諸文士戲贈潘丞聯句。十二月有沈氏述祖德記。玄靖李先生碑銘。公在郡。及門生弟姪。多攜壺機楫。以遊峴山。觀左相右鱗聯句序。謂因積溜深石。嵌爲鱗形。酌酒其中。結宇環飲。

九年甲寅

公年六十六。正月作干祿字書序。書於刺史宅東廳院。又有韻海鏡源。公天寶中守平原。與封紹高。質族弟渾脩。成二百卷。屬祿山作亂。止存四分之一。及刺撫州。與左輔元等增廣成五百卷。至是刊削繁辭。纂而成文。凡古今文字。該於理者。摭筆撮要。罔有不備。爲三百六十卷。是年有乞御書題額。恩敕批答碑陰記。妙善寺碑。贈僧皎然詩。

十年乙卯

公年六十七。有元次山表墓碑銘。歐陽領軍碑銘。

十一年丙辰。

公年六十八。四月有崔孝公陋室銘記。初響溪東南有白蘋洲。梁太守柳惲江南曲。汀洲採白蘋。日暮江南春。後人因以名洲。至是公始剪榛導流。作八角亭。及茅亭。書惲誌于上。有康使君碑銘。

十二年丁巳。

公年六十九。四月有柳惲西亭記。吳興集十卷。元載誅。楊綰薦公。四月召於湖州。五月有項王碑陰述。八月爲刑部尙書。

十三年戊午。

公年七十。正月三抗章。乞致仕。不允。二月有過瑤臺寺懷圓寂上人詩。是年進吏部尙書。按家譜。以十二年十二月爲吏部尙書。充禮儀使。攷舊史記及詩序。今年正月乞致仕。二月謁昭陵。猶爲刑部尙書。不應十二年已除吏部。今參之行狀。神道碑。史傳。所載先後。進吏部。當在今年。充使乃代宗晏駕之後也。

十四年己未。五月德宗卽位。

公年七十一。五月代宗崩。充禮儀使。七月。奏列聖諡繁。有請復七聖諡號狀。時袁僂議云。陵廟玉冊已刻。不可輕改。僂蓋妄奏。不知玉冊皆刻初諡而已。又有論元皇帝祧遷狀。

德宗建中元年庚申。

公年七十二。七月有顏少保碑銘。時楊炎當國。公以直不容。八月爲太子少師。依前禮儀使。有左輔元所編禮儀集十卷。

三年壬戌。

公年七十四。上方倚以爲相。廬杞忌之。八月改太子太師。罷其使。

四年癸亥。

公年七十五。正月李希烈陷汝州。廬杞建遣公爲宣慰使。往諭之。公卿失色。李勉密表固留。不報。既至。宣詔旨。希烈養子千餘人。交刃脅公。後又囚於官舍。守以甲士。掘方坎于廷。傳將阬之。期公毀節。公謂希烈曰。死生有定。何多端。一劍見與。卽覩快事。希烈不敢逼。

興元元年甲子。

公年七十六。有奉命帖。題驛舍壁。會周曾等謀襲汝州。奉公爲節度。事洩。希烈殺曾等。拘送公于蔡州。貞元元年乙丑。

公年七十七。正月有移蔡帖。時公已幽辱三載矣。度必死。乃自作遺表。墓誌。祭文。指寢室西壁下曰。吾殯所也。八月希烈使閹奴與辛景臻等。縊殺公於龍興寺。

二年丙寅。

四月。希烈爲牙將陳僊奇所殺。蔡州平。十一月。奉公喪歸葬于萬年縣之鳳棲原。公之死也。舊史記云。

貞元元年正月始聞廢朝贈諡傳乃謂死於興元元年八月新史記以爲貞元元年之八月神道碑前書月日同舊傳後又云貞元初遇害希烈之誅新舊史記作今年四月舊史傳復云貞元元年仙奇護公喪歸致之移蔡帖貞元元年自汝移蔡行狀及嗣曹王皋表柳程常侍言旨並云是年八月賊命辛景臻等於蔡州龍興寺縊公明年希烈死仙奇歸喪則舊史記傳不但書公之死先後失次而平蔡歸喪之年亦復差互令狐峒固自戾其說而通鑑復取諸舊史何耶恐他有所據新史當必見行狀與移蔡之帖也新史公年七十六舊史七十七按大歷十三年公年七十爲刑部尙書三抗章乞致仕不允後死於貞元元年當年七十七

謹案顏魯公文忠集四庫著錄者爲錫山安國重刻宋留元剛本。惟時臣復卽遺文之見於石刻及說部諸書者輯爲補遺一卷。然據提要所稱正集十五卷補遺一卷外尙有年譜一卷附錄一卷。乃現行武英殿聚珍本並無年譜及附錄。或者閣本有不同耳。但殷府君顏氏及尉遲廟二碑提要謂增入補遺者聚珍本亦所未有。又和政公主碑顏元孫墓志全唐文內具錄全文。聚珍本補遺係從江氏筆錄探出。故殘缺不全。非特和政誤作政和而已。是以道光間甯鄉黃本驥復加蒐訪重編爲正集十二卷外集十八卷。雖失宋本面目。然較爲詳備矣。特其意在貪多。凡外集所列乃自唐宋以來諸家所作魯公誌狀碑銘制誥及唱和詩文書評等類。悉非魯公手筆。未免蹈明人取盈卷帙之陋習。卽其增入正集者除詩文以外所收諸帖。往往聚珍本所已收。黃氏改其標題載諸跋語。其實集中並未另有他帖。以致目錄與跋多不相應。如捧袂帖卽與李太保帖之第一首。朝回帖卽與李奉辭帖卽與盧倉曹帖之第一首。皆聚珍本所已載。黃氏謂可補正集之遺。固失之不考。卽黃氏所收輯者如集載與李太保帖第四首。跋中稱爲硤州帖。與李太保帖第九首。跋中稱爲謝鹿脯帖。與盧倉曹帖第三首。跋中稱爲送許帖之類。皆與目錄標題互異。故悉爲糾正之。今正集與補遺一仍聚珍版原本。而以黃氏所採集諸文及詩與文詩闕訪目益以安刻留元剛所作年譜統編爲拾遺四卷。其和政公主碑顏元孫墓志緣聚珍本補遺所載。旣多殘缺。故亦據黃本另刻全文。非重出也。若黃本所編外集十八卷旣係他人之作。則不復備列焉。光緒甲午仲秋會稽孫星華原名謹識。